

XTIIDZ DIOS MINE PQUIAA

MARCW

1 Nu ganle laa naa csilo gzodiidz naa, mine been Jesús, Men ne bneee Dios cxeel me lo guidzliu.

²Lo guits ne pquiaa Isá, tib men ne biadteed xtiidz Dios padzeela, lo co zhubnee ganle ible laa Dios no cxeel me. Rneew, glo cxeel me tib zha ne tedner, guiaadnie diidz. Znu zhubnee lo guits co:

Sxel naa tib zha ne tedner lo luu,
zeena zha co gzhixcuaa nöz ne ted luu.

³Dan tso zho,

zon miech zeene laa tsi zho zëeb gnee zho:

“Golzhixcuaa nöz ne ted men ne rnabey,
golsaan grë guielntseeb ne run to.”

⁴Ni nligaa scase goca, zeene laa Juan Bautist biaad, dan bio me rchoobnis me miech; rnee me lo zho csaan zho xquielntseeb zho gbig zho lo Dios, ni chobnis zho, zeena csilaa Dios zho lo grëtaa xtol zho. ⁵Dzigo rree miech grë guiedz ne ngab Judé, dib lad guiedz Jerusalén, rieuiaadiag zho zhiwseed me; ni rxobdol zho grë xtol zho, dzigo rchoobnis me zho len guiubee Jordán.

⁶Guits lad camell niaa xab me, ncuaane rzhidoo len me guid niaaw ni niapse nguzhanch ni dzin dan row me. ⁷Zeene rseed me grë miech co, rnee me lo zho:

—Iraa ziaad men ne mazdraa non lo naa. Tel naa peet nond naa, tib guielnzaac nroob ga ygaa naa telne niaca mine grielo maase lab me glit naa; per na ni min co rdzind naa. ⁸Laa naa rchoobnis to niina con nis; sangue me con Espíritu Sant choobnis me to.

Brobnis Jesús

(Mt. 3:13-17; 4:1-17; Lc. 3:21-22; 4:1-15)

⁹Len ngbidz coquew, laa Jesús brieed guiedz Nazaret xtan zha Galilé, güey me pchoobnis Juan me len guiubee Jordán. ¹⁰Laa me norieedze lo nis, zeene gon me laa zhan gbaa bzhial, laa men ne nac Espíritu Sant biet gbaa zig tib palom laa me ziad-zëeb guic me. ¹¹Ni lëëtaque zëeb tib tsi men co gbaa, rnee me:

—Xin, rleynie naa luu gon, nziuu luu lo naa.

¹²Zeene blozh brobnis me, dzigo güeynie Espíritu Sant me tib dan ngan, zaatne no grë ma ntseeb; ¹³bio me ga choo ngbidz. Ga no me güey Satanás (ma ne rnabey lo grëse mendox), gocladz ma niungüet ma me.

Bdedse ga, güey grë xanjł Dios güeygan zho me.

¹⁴Len ngbidz co bnabey Herod bio Juan ladzguiib. Ladzguiible no Juan zeene brieë Jesús güeyted me grë guiedz ne ngab Galilé güeyseed me miech Xtiidz Ndzon Dios, ¹⁵rnee me lo zho:

—Laa dze ne gnabey Dios ziaadgaxle, laaw bdziñ dzele. ¡Golsaan grë xquiełntseeb to, gołnab perdon lo Dios; dib zdoo to golliladz Xtiidz me!

Tap zha ne quia gooz meł

(Mt. 4:18-22; Lc. 5:1-11)

¹⁶Tib dze zieded Jesús ro Nisdoo ne lë Galilé, gon me laa Simón grop Ndrés quia gooz meł lo nis co; sac ible dziin co nac xtsiñ zho. Grop bets zho laa zho noron guie x ne rgaa meł lo nis. ¹⁷Dzigo bredz me zho, rëb me lo zho:

—¡Goltë, goltënal zhits naa! ¡Laa naa cxel to tsie to stib gooz, tsietop to grë miech ne sëëb xnëz Dios!

¹⁸Hor cogazh psan zho guie x ne rnaaz zho meł ga, laa zho zienal zhits me.

¹⁹Zhisaque bzë Jesús ro nis co, gon me laa Jacob ni Juan no tib len barcw noquiaabdie zho guie x ne rnaaz zho meł, lëë grop xingan Zebedé ga; ²⁰dzigo bredz me zho. Zigne bredz me zho, zoque Zebedé lo barcw ga grë xmoz Zebedé, laa zho zienal zhits me.

Tib mgui ne nosacsi mendox.

(Lc. 4:31-37)

²¹Laa zho bdziñ guiedz ne lë Capernaum. Zeene goł dze ne rdziiladz zho lo dziin nëz Israel, güey Jesús yadoo win ne zob lad guiedz co güeyseed me miech. ²²Grë miech ne ndxie len yadoo ga, rzee zdoo zho ran zho zha rnee me, sac rlu men rnabey nac me; led yed me rseed zigne rseed grë zha ne nac maistr ley.

²³Lad grë miech co no tib mgui ne nosacsi mendox, tibaque zeene nguiedz pcooptsie ma mgui, ²⁴rnee ma:

—¿Pe gun luu no Jesús Nazaren? ¿Ziaad luu lëë par gnitlo luu no? Runbey naa luu, tib men peet xtold nac luu ni Dios pxeel luu.

²⁵Dzigo goctox Jesús lo ma, rëb me:

—¡Psoog ro luu! ¡Na zeena psaan men qui!

²⁶Hor co masaque beencxidz ma mgui co, ni rquiaadan ma redz laa ma psaan mgui. ²⁷Grëse miech ne ndxie ga, bzee zdoo zho, rnabdiidzlsa zho rnee zho:

—¿Bay cho nac men qui? ¡Wseed cub i gon ziaadnie me! ¡Rlu zha rnabey nac me, zha haxta mendox rdzieb zeene ractox me lo ma!

²⁸Znuse brieets bliaal diidz zha beenguiac Jesús mgui co; grëse guiedz ne ngab Galilé gocnan miecha.

Biac xniadzoop Simón Pedr

(Mt. 8:14-17; Lc. 4:38-41)

²⁹Ga brieë Jesús güey me lidz Simón grop Ndrés gza me Jacob ni Juan. ³⁰Bdziñ zho, lëëtaque laa xniadzoop Simón nix rlan xlëë, nacne rëb zhow lo me. ³¹Dzigo bded me zaatne nix zhuz co, bzheñ me nia me, blische me me. Hor cogazh laa zhixlëë me blëz, guche me ga psilo me beenlo ncuaañe dow zho.

³²Ziedzele dzew, laa ngbidz rzëëblew, zeene psilo grë miech co zo zo rdzinnie zho grë meñ rzacnë, grë zha ne nosacsi men̄dox ne; bioogse ro yu co ndxie miech. ³³Zootle zig grëse miech ne no lad guiedz co pcaalsa ga.

³⁴Ndal grë meñ rzacnë co zhaase zhaase guielguidz ne rzac zho, per beenguiaç Jesús zho; zha ne nosacsi men̄dox, beñcxoon me grë men̄dox ne nosacsi zho. Goctox me lo ma, ib bdeete me diidz nee ma cho nac me, sac runbey ma me.

Pseed Jesús miech Galilé

(Lc. 4:42-44)

³⁵Silgaw, scase bii ncow rnaw guche Jesús brieë me lad guiedz co, güey me zaatne guiend̄raa miech, güeyzodiidznie me Dios. ³⁶Zeene rnit me choot guiend̄; dzigo brieë Simón ni zla zha ne nacgza Simón güeyguib zho me. ³⁷Zeene bdziel me, rëbchaa zho lo me laa grë miech co quiaguible me.

³⁸Dzigo pquiab me rëb me lo zho:

—¡Sca ye! Per ib laa ne none gon̄ guio grëraa guiedz ne ndxie dib gax nu, zeena ye grë guiedz qui gnee naa Xtiidz Dios lo miech; sac ible min̄ co pxeel me naa zial̄ naa lo guidzliu.

³⁹Dzigo güey zho grëse guiedz ne ngab Galilé. Zaatne rdziñtaa zho, rie me grëse yadoo win ne zob lad guiedz rseed me grë miech co Xtiidz Dios, ni runcxoon me grë men̄dox ne nosacsi miech.

Biac tib mgui ne rlan lepr

(Mt. 8:1-4; Lc. 5:12-16)

⁴⁰Tib vuilt, wbig tib mgui ne rlan guiedz dox ne lë lepr lo Jesús (masaque riaal̄ dipse guid lad mgui), pquiitsgzhib mgui lo me, rëb mgui:

—Tebaa siguieel̄ luu gunguiac luu naa.

⁴¹Pquia zdoo Jesús mgui, pxobnia me guic mgui rëb me:

—Zunguiac naa luu. ¡Niinagazh laa luu guiaan̄mbe!

⁴²Zigne sca bnee me laa mgui co biac, mbese biaan̄ xcuerp mgui. ⁴³Blozh ga bzonëz me mgui, ni pso me diidz lo mgui ⁴⁴rëb me:

—Bina gan̄le, choot lo gzodiidzd luu gon̄ zha biac luu. Bzë, güey lo pxoz, güeysan̄ gon̄ ne rnabey xley Moisés gdeed luu; zeena gan̄ zho gan̄le laa luu biacle.

⁴⁵Ni zigne brieë mgui ga, psilo mgui grë lo miech bzodiidz mgui zha biac mgui. Grëse miech gocnana, nacne brieelodraa nen̄lo ndziñ Jesús grë lad

guiedz co. Mine been me, blöz me zaatne choot miech guiend; per niicle scaw, miech guizhiu ne rriee grë guiedz co rdziñ lo me.

Biac tib men ne gutoo

(Mt. 9:1-8; Lc. 5:17-26)

2 Goc bla dzew, laa Jesús biire bdziñ lad guiedz Capernaum stib. Zeene bin zho laa me bdziñ ro yu, ²miech guizhiu ne pcaalsa zaatne no me ga, haxta ro yu ndxie grë miech co; dzigo psilo me noseed me zho Xtiidz Dios.

³Laa grë miech co ndxie ga, zeene bdziñ tap zha bgui ney zho stib men bgui, zhoobse me lo yag, ib gacd së me sac dipse me gutoo. ⁴Ni ne scataa miech guizhiu ne ndxie, gacd ted zho nëz ro yu gdziñnie zho me lo Jesús, nacne biepaque zho guic yu. Pخال zho ngali zaatne zob Jesús, dzigo ga pteed zho men co dib yag ne zhoob me ga. ⁵Zeene gon Jesús ne nli dib zdoo zho rliladz zho me gunguiac men rzacné co, dzigo rëbchaa me lo men co:

—Xin, niinagazh laa naa gun perdon grëse xtol luu.

⁶Blalaa zha ne nac maistr ley zob ga, zeene bin zho sca rëb me lo men rzacné co, bzachaa zdoo zho: ⁷“iLëda i gon squi rnee men qui! Quiaguitnie me Dios i squi rzë xtiidz me. iTibaque men ne run perdon xtol miech, ni lëë men co nac Dios!”

⁸Bienga Jesús sca rza zdoo zho, dzigo rëbchaa me:

—iPe nacne rlëë to ron to mine rne naa? ⁹Parga nli, cholze zha ne zac guiab: “Laa naa gun perdon grëse xtol luu.” ¹⁰Per laa naa glu lo to ganle, naa ne nac naa Men ne pxeel Dios zial naa lo guidzliu, ible naa no gun miech perdon.

Dzigo bnee me lo men rzacné co, rëb me:

¹¹—iGuche i, bi yag ne bzhoob luu i, zeen bzë!

¹²Zigne sca bnee me laa mgui co bzoli, blis me yag co, grop lo grë miech co gon zho laa me brieë ga, laa me zey. Grëse zho rzee zdoo zho, rleynie zho Dios rnee zho:

—iNasi laa ne nodzian ncuaañe gard dzian ne!

Bredz Jesús Leví

(Mt. 9:9-13; Lc. 5:27-32)

¹³Blozh ga, laa Jesús brieë ga laa me zie nëz ro nisdoo stib; nzian miech ne pcaalsa lo me ga, dzigo pseed me zho.

¹⁴Ro nis co ziezë me gon me Leví, xingan Alfé, zob Leví zaatne rietizh zho contribucion, dzigo bredz me Leví tsienal Leví zhits me. Guso Leví ga, laa Leví zienal.

¹⁵Bded ga, bredz Leví me güey me tib wagw lidz Leví. Grë zha ne nac recaudador, grë zha ne zëëb diidz nac zha yozh, tipse lo mezh bzobnie me zho grë xpëëdsuel me; sac ndal grë zha co zienal zhits me.

¹⁶Blalaa maistr ley ne nacgrë zha farisé, gon zho sca tipse noyownie Jesús grë zha co; bded ga, rëbchaa zho lo xpëëdsuel me:

—iMod sca na rownie xmaistr to grë zha ngoopdol, grë zha beed ne nac recaudador!

¹⁷Dzigo rëbchaa Jesús lo zho:

—Nanle to ganle, meñ ne run rmed, zaatne no zha ne rzacnè, ga rquiin zho, ÿniacxe squiin zho zaatne no zha ne ndip ndaan? Ni min co rac niina, tel naa zialguibd naa miech wen, sinque laa naa zialguib miech ngoopdol.

¿Pe nacne rcuand xpëëdsuel Jesús?

(Mt. 9:14-17; Lc. 5:33-39)

¹⁸Lëëtaque dze co nocuan xpëëdsuel Juan Bautist, grè zho zha farisé. Dzigo dzin bla zha ne bnabdiidz lo Jesús, rëb zho:

—¿Pe nac waa ib rcuand xpëëdsuel luu? Zha grè xpëëdsuel Juan Bautist ni grè zha farisé, rcuan zho.

¹⁹Pquiab Jesús, rëb me:

—Zaatne nadien noyac tib guieltsieel, ¿pe niacxe lega csilo grè zha ne ndxie lo lni tso zho guielnè, ycuan zho ni ran zho laa mgui ne notsieelnia mban?

²⁰Per dzin dze zeene laa mgui co gbiche; ni zeene laa dze co gdzin, dzigosi nagon riegual tso zho guielnè, riegual ycuan zho.

²¹Ranle to ganle, zha ne rquiaabdie tib lè lar, rquiaad zho lar cub lad lar gox, sac zha ne sca gun, paat yquiind wquiaabdie co. Zeene laa lar cub gbe, lëëque lëëw gunnat zaatne nriez lar gox. ²²Scaque tsod zha ne cotsow vin cub tib len guid ne padzeelale noquiin, sac stsiez vin cuba; dzigo niicle guid cow, niicle vingaaw laaw nitlo ga. Gacxe, tel vin cuba none len guid cubaque tsotsowa.

Ptop xpëëdsuel Jesús mzion zhobxtil

(Mt. 12:1-8; Lc. 6:1-5)

²³Tib dze ne rdziiladz zho lo dziin nëz Israel, bdednie Jesús xpëëdsuel me zaatne zëëb zhobxtil, dzigo zigse zieded zho pchoo zho palal mzion zhobxtil co. ²⁴Gon zha farisew, dzigo rëbchaa zho:

—¿Lèda i gon noyun to! ¿Golguien ganle dze nda nac dze rii!

²⁵Dzigo pquiab Jesús, rëb me:

—¿Pe gard glab to zaatne ziaad ganle zha been rey David tib dze zeene pcaabedz me grè me zha ne ziegza me, ni zienied zho pe gow zho? ²⁶Rneew, bzëëb me len yadoo güeynab me quietxtil ne nac gon, downie me grè zha ne ziegza me ga, ni loxaque zha ne nacse pxoz row quietxtil co. Len iz co nac men ne lè Abiatar pxoz nroob. ²⁷Golgacnan sca ganle, biaand dze rii par csacsi miech xcuerp zho, sinque ne rleynie Dios miech gane psan mew. ²⁸Naa ne nac naa Men ne pxeel Dios zial naa lo guidzliu, naa rnabey dze rii, nanpaa naa pe nac mine nonguiel gac.

Biac tib mgui ne mband tib nia

(Mt. 12:9-14; Lc. 6:6-11)

3 Gol stib dze ne rdziiladz zho lo dziin, güey Jesús len yadoo win ne zob lad guiedz co. Lad grè miech ne no len yadoo co, no tib mgui ne mband tib nia. ²Nzian zha ne ndxie ga, quialeets zho Jesús dien pe zunguiac me nia

mgui co dze ne rdziiladz zho lo dziin. Quiambëz zho dien pe guṅ me, par gdziel pe yquiaaqui zho me. ³Dzigo bredz me mgui co, bnabey me bzo mgui groṽtaa lo grë zha ne ndxie ga; ⁴blozh ga rëbchaa me lo zho:

—¿Pe nadien rzac to nonguiel guṅ ne dze rii? ¿Pe nonguiela guṅ ne ncuaaṅe yquiiṅ, te nonguiela guṅ ne guielntseeb ye? Zig nac samiech ne zha ne noxtseeb xquielmban, ¿pe maase csaan ne guet zho?

Ni tib zho pquiabd. ⁵Dze bui me lo zho grëse zho, wbiṅladz guic me, ni mban goc zdoo me goṅ me scataa ntseeb zdoo zho; dzigo rëb me lo mgui co: —Bzigaa nia luu.

Zigne bzigaa mgui nia mgui, laaw biac.

⁶Grë zha farisé, ni grë zha ne nacie rey Herod, zigne brieë zho ga laa zho psilo bnediidz dien zha gdeeda diidz gut zho Jesús.

⁷Leṅ dze co, tib vuelṅ bdziṅ Jesús ro nisdoo grë xpëëdsuel me. Miech guizhiu ne naṽ zhits zho, ga zie grë zha ne ziaad nëz Galilé, grë zha ne ziaad nëz Judé, ⁸grë zha Jerusalén, grë zha ne ziaad nëz Idumé, grë zha no dib nëz dan ro guiubee Jordán, grë zha ne no dib gax guiedz Tiro ni guiedz Sidón. Miech guizhiuw, sac ron zho grëtaa milagr ne ruṅ me.

⁹Dzigo bnabey Jesús xpëëdsuel me, yguib zho tib leṅ barcw zaatne gac so me zeena ctaagwd grë miech co me. ¹⁰Zëëble diidz ndal miech ziyunguiac me, dzigo grëse zha ne rlan pe guielguidz, rbigbe zho dien zha grieelo maase lad xab me xen zho.

¹¹Grë menṅox ne noguitnie miech, zeene ran ma me, ruṅquiitsgzhìb ma zha ne noguitnie ma lo me, ni rquiaadan ma redz rnee ma:

—¿Xpëëd Dios nac luu!

¹²Per ractox me lo ma, rsaand me gnee ma parne xoobnend cho nac me.

Ble Jesús gza tsiipchop xpëëdsuel me

(Mt. 10:1-4; Lc. 6:12-16)

¹³Blozh ga bieṅ me tib guic gui win zob ga, ga bredz me zha ne gocladzse me. Zeene pcaalsa zho grë zho, ¹⁴dzigo lad co ble me tsiipchop zha ne sënìe me, zha ne cxeel me tsieseed miech Xtiiṅ Dios. Lëë zha co bleelë me poxtl, ¹⁵ni bdeed me poder lo zho guṅcxoon zho menṅox.

¹⁶⁻¹⁹Znu lë gza tsiipchop zha ne ble me ga:

Simón (lëë Simón co bleelë me Pedr),

Jacob ni Juan (xingan Zebedé, zha ne bleelë me Boanerj; diidz co nac zig nacne rnee nee “Zhin Nguzi”).

Ndrés,

Lip,

Bartol,

Matew,

Mazh,

Jacob (xingan Alfé),

Tadé,

Simón (zha ne nacgrë zha ne racladz cuee zha Roma xtan zho),
ni Judas Iscariot (zha ne güeyto me).

Rëb zho mëndox nacie Jesús

(Mt. 12:22-32, 46-50; Lc. 8:19-21; 11:14-23; 12:10)

²⁰Wbire Jesús ga, laa me bdziñ ro yu grë me zho. Scasaque ndal miech ne pcaalsa ga stib, ni rdeetew diidz gownie me zho. ²¹Zeene bin menlidz mew, dzigo brieë zho ziexi zho me, sac rëb zho bod rzhinle guic me.

²²Haxta grë maistr ley, zha ne brieë nëz Jerusalén bdziñ ga, rnee zho:

—Beelzebú, ma ne rnabey lo mëndox, ma co nacie me gane rrieelo runcxoon me mëndox.

²³Dzigo bredz me zho bzodiidz me tib cuent lo zho, rëb me:

—¿Pa nan to na grielo lëëque mëndox guncxoon samëndox ma? ²⁴Tel tib guiedz nadien gac miech chop dii, csilo zho tillsa zho, ¿niacxe nitlod guiedz co? ²⁵Tib diigaa miecha, tel csilo zho lëëque zha tilnie menlidz zho, ¿niacxe nitlod zho? ²⁶Scaquegaa mëndox nagon, telne lëëque lëë ma tilnie samëndox ma, ipe nale na bnitlo ma! ²⁷Masaque nac mëndox zig tib zha ne no xfuerz, zha ne gacladz cuee grë ncuaañe no lidz zha co, none cxidoogazh zho zho.

²⁸Gneli naa lo to ganle, grëse dol ne run miech, grë tel zha rguie zho, rdzibdee zho, bii zun Dios zho perdon min co; ²⁹sangue zha ne gneenë Espiritu Sant, dol nroob ga run zho, gdziñd dze ne gun Dios zho perdon.

³⁰Sca rëb me lo zho, sac sca quianee zho rëb zho mëndox nacie me.

³¹Hor co laa xniaa me ni zha bets me bdziñ, per leyse blëz zho; dzigo pxeel zho zha ne zietsedz me. ³²Blalaa zha ne zob gaxpaa lo me, zha co been vis, rëb zho:

—Laa xniaa luu gon, ni zha bets luu ziaadguib luu.

³³Pquiab me rëb me:

—¿Xnia naa ye, bets naa ye?

³⁴Dze bui me lo grë zha ne ndxie ga, dzigo rëbchaa me:

—To gon nac xnia naa, to nac bets naa. ³⁵Sac grëse zha ne run mine racladz Dios, lëë bets naa ga, lëë bzian naa ga, lëë xnia naa ga.

Xcuent zha ne güey gon

(Mt. 13:1-23; Lc. 8:4-15)

4 Dze coquew, laa Jesús psilo quiaseed miech zaatne nac ro Nisdoos Galilé ga. Miech guizhiu ne pcaalsa lo me, nacie güeytsep me tib len barcw ne zo ro nis co, ga bzob me laa grë miech co bre tib ro nis. ²Ndal grë ncuaañe pseed me zho, per niapse con cuent rnee mew lo zho. Lëë tib cuent ne bzodiidz me ga nu, rëb me:

³—¿Golquiaadiaga ganle! Tib mgui name, brieë me güey me gon zhobxtil.

⁴Zeene laa me quialaal zhob co, mine bliaal gax ro nëz; znuse güey grë mguin güeytow maw. ⁵Laa mine bliaal zaatne nac lo quie, znuse znuse blana; ⁶per zeene laa lo ngbidz brieë, znusaque bgoola, blozh ga bidzgow; sac guieñd nroob

low. ⁷Laa minē bliaaḷ zaatne nac len yag guiets, zeene laa grē yag guiets co broob znuse bnitlo yag guietsa, pasēw niac. ⁸Sangue grē minē bliaaḷ zaatne nac lo liu naaḷ, blana, brooba ni goca; lo tib tib zhub co no mzion co brieē galptsii zhub, now brieē tsonḡala, nogaaw brieē haxta tib gayoow.

⁹Blozh ga, rēbchaa me lo zho:

—Zha ne racladz guien minē rne naa, yquiaadiag zhow.

¹⁰Zeene laa grē miech co zey, laa gza tsiipchop xpēēdscuel me, ni zla zha ne rzēnie me, laa zho bnabdiidz lo me dien zha nac cuent co. ¹¹Dzigo rēbchaa me lo zho:

—Tel to, Dioszhal rlu lo to zha rnabey me, niicle ncuaaṅe mazdraa nḡueetsa; laa lo grēraa miech ne gard gbig lo me niapse con cuent rzodiidz naaw lo zho parne guien zhow. ¹²Per niicle scaw, nzhal diag zho ron zho, per peet riend zho; nzhal lo zho rwi zho, per peet rand zho; ib nēd zho gbig zho lo Dios, gnab zho gun me zho perdon.

¹³Nana to, telne biēde to zha nac cuent co, ¿zha guien to grēraa minē gne naa dzigo? Golquiaadiaga ganle, znu gon naca: ¹⁴Mgui ne güeylaaḷ zhub ga, rrieēquia lēē zha ne rienee Xtiidz Dios lo miech ga, laa zhubxtil co nac Xtiidz Dios. ¹⁵No miech nac zig nac ro nēz ne bliaaḷ palal zhub co: rquiaadiag zho Xtiidz Dios, rlozh ga lēēlēd rdziṅ mendox rquiil ma zho, rsaanga zhow. ¹⁶Nogaa zho nac zigne nac lo quie co: zeene rquiaadiag zho Xtiidz Dios, ine rley zho rcaania zhow, ¹⁷per led dib zdood zho rcaania zhow; gane zeene laa miech rsilo riēē lo zho, laa miech rtsidiḷ zho porne rliladz zhow, rsaanga zhow. ¹⁸Zzhisgaa zho nac zigne nac len yag guiets co: nli rquiaadiag zho Xtiidz Dios, ¹⁹per rsilo zho lel grē ncuaaṅe no lo guidzliu rii mazdraa rionie guic zho, rquidie grē dimi zho, rzoobladz zho yquianie zho grēse ncuaaṅe racladz zho. Grē ncuaaṅ co rioxcoraa zho, laa ne tsonie Xtiidz Dios guic zho, min co rquiaqui ib rund zho minē rnabey me. ²⁰Laa nogaa zho nac zigne nac liu naaḷ co: rquiaadiag zho Xtiidz Dios, dib zdoo zho rliladz zhow, ni rban zhow zigne naca. Grē zha co, no zho nac zig mzion ne brieē galptsii zhub ga, no zho nac zig minē brieē tsonḡala, nogaa zho nac zig minē brieē tib gayoow ga.

Xcuent biini ni midz moxtaz

(Mt. 13:31-32, 34-35; Lc. 8:16-18; 13:18-19)

²¹Blozh ga, biire pcaalsa miech lo me, dzigo rēb me lo zho:

—¿Pa dien rquiin biini? ¿Pe rquiaguiv par tsolana tib len guin o soogaaw tib zhan lon? Led zeene rquiaguiv lēē, zaatne grielo gziiniw ga rzoob zhow. ²²Scaque nagon grēse ncuaaṅe rac nḡueetsa, grēse ncuaaṅe rnee miech zhliana, ib none xoobneṅa.

²³Telne racladz to guien to minē rne naa, golquiaadiaga; ²⁴ni zigne ron tow scagaa goltsoxco golḡuna. Telne tsoxco to gun tow, scagaa zioguicraa tow. ²⁵Sac zha ne tsoxcow, zdeddraa Dios guielbiini lo zho; sangue zha ne tsoxcoda, haxta tel palalse guielbiini ne bdeed me lo zho stiche mew.

²⁶Ni rēb me lo zho:

—Znu gon nac zha ne ngab lo Dios; nac zho zig bni ne ran miech. ²⁷Zha ne rielaal bni co, liu rcow, liu riini, laa zho raaguies, laa zho rieche. Sca sca laa dze zie, laa bni co ratslo, laaw rlan, laaw roob, per riend zho zha nacne laaw roob.

²⁸Zhal guidzliu rdeeda guieInzaac co, guizh nac zhob co zeene rana, rac palal dzew laaw rlan mzion. ²⁹Laa zeene laaw ral, dzigo laa zho rietiitsa, sac laa dze bdzinle ne laaw tsas.

³⁰¿Zha ganle gni naa lo to zeena guien to zha nac xquielrnabay Dios? —rëb Jesús—. ¿Pa tib cuent ganle gzodiidz naa lo to zeena guien to zha naca? ³¹Naca gon zigne nac tib midz moxtaz ne ran miech dan rii. Midz moxtaz nac midz ne mazdraa win, ³²ni tel gacbniw, rrooba, ni lëew rroobraa lo grë guizh ne ran zho ro yu, haxta grë mguin riezaa zhiptsieez ma low sacne ncala.

³³Nzian grë cuent rii pquiin me par cseed me grë miech co, ni laa me bnee mine rgobey me guien zho. ³⁴Niapse sca rseed me zho, laa zha ne nac xpëedscuel me, zeene zhasew rnee mew lo zho zigne naca.

Pcuëz Jesús tib me dox

(Mt. 8:23-27; Lc. 8:22-25)

³⁵Zeene bdze dze co, rguetsle liuw rëbchaa me lo xpëedscuel me:

—Golgotsoa dieedquia ne stib nëz lo nis rii.

³⁶Blozhse bnee me lo grë miech co, laa zho biepl len barcw ne zob me ga grë me zho, laa zho zie. Ye blalaa barcw ne zob lo nis co ziana.

³⁷Laa zho zie, tibaque zeene laa tib me dox psilo briece, masaque rlis me lo nis co; zeene riasoli low riechoona len barcw, laa barcw psilo noyodzële nis.

³⁸Dzigo güey zho güeycuaan zho Jesús, sac lëëtaque laa me nixguies nëz zhan barcw ncoogse me tib lmad.

—¡Maestro! —rëb zho—. Bui ganle, ¿pe znuse csaan luu nitlo ne nu?

³⁹Dzigo guche Jesús, bnee me lo me co, bnee me lo nis co, rëb me:

—¡Lëew ga na! ¡Golcuedze!

Zigne sca bnee me, laa me co blëz, niicle nis cow laaw bredze. ⁴⁰Dzigo rëbchaa me lo zho:

—¿Pe nacne squitaa rdzieb to? ¡Gardaque dzigo lëë gliladz to cho nac naa!

⁴¹Riendraa zho zha gun zho lo dzeb co, ni rnabdiidzlsa zho rnee zho:

—¿Bay cho nac me, zha nacne haxta me, haxta nisdoo ron xtiidz me?

Men Gadar ne nosacsi mendox

(Mt. 8:28-34; Lc. 8:26-39)

5 Bdzin Jesús nëz dan ro nisdoo co gza xpëedscuel me, ga nac xtan zha Gadar. ²Laa me bietdze len barcw, zeene laa tib mgui ne nosacsi mendox bdzin lo me. Len baa briece mgui co bdzin me ga, ³⁻⁴sac len baa nac zaatne rbëz me. Miech ne lëbd zho low, nzian vuelt ziezooob zho caden nia me, ni me ne, per znuse rchug mew, rzhooŋga me. ¡Choot rlëbd lo me! ⁵Dze, guieel quianzë me grë dan co, rietso me grë len baa. Roptsiedan me, ni lëëque

me rzhen̄ quie rchug me guidlad me. ⁶Laa dze co, zitraa gon̄ me Jesús, rias me bdzin̄ me pquitsgzh̄ib me lo Jesús. ⁷⁻⁸Dzigo goctox Jesús lo mēndox ne noguitnie me, rēb Jesús:

—¡Mēndox, psaan men̄ qui!

Hor co pcooptsiedan mēndox co mgui co, ni rnee ma lo Jesús:

—¿Pe gon̄ luu naa Jesús? Run̄bey naa luu, Xpēēd Dios ne no gbāa nac luu. ¡Ne nlipagaa been̄ guieIn̄zaac csacsid luu naa!

⁹Dzigo bnabdiidz Jesús lo ma dien̄ cho lē ma. Pquiab ma rēb ma:

—Legion lē no, sac nzian nac no.

¹⁰Rnab grē mēndox co lo Jesús, gzonēzd me ma zit. ¹¹Gaxaque zhan gui co ndxie tib dzoon nguts noyow, ¹²dzigo bnab ma lo Jesús, rēb ma:

—Bzhiguiel̄ lose grē nguts qui bzonēz no.

¹³Bdeed Jesús diidz. Dzigo laa grē mēndox co psaan mgui co, laa ma zie bzēēb ma zdoo grē nguts ne ndxie ga; psilo grē nguts co rquiaa ma corr güeypix ma glaa tib ro yee ne quia ro nisdoo co, bliaaI ma haxta lo nis. Ga biep ma nis, grēse ma gut. Rgaa ma zig chop mil.

¹⁴Zha ne quianap grē nguts co, gzase zho bzhoon̄ güeyzodiidz zhow lad guiedz, ni grēraa yu ne zob gax ga. Brieē grē miech co, zieso zho. ¹⁵Zeenē bdzin̄ zho, per nli bdzieb zho, sac gon̄ zho laa mgui ne sca bdziitnie mēndox ga zobse lo Jesús, laa mgui nacwxable, rlu ndzinlile nac guic mgui. ¹⁶Grē zha ne gon̄ zha biac mgui co, ni zha goc grē nguts co, psilo zho rzodiidz zhow lo grē zha ne bdzin̄ ga. ¹⁷Min̄ co bin grē zha co, mazd bnab zho lo Jesús siguiel̄ me gbi me xtan zho.

¹⁸Zeenē laa Jesús zie sēēb me len̄ barcw, dzigo laa mgui co wbigaque lo me, nan̄ mgui nziguiel̄ me nienal̄ mgui zhits me. ¹⁹Per bdeete me diidz, rēb me:

—Wbire, güey güeyzodiidz lo grē men̄lidz luu gan̄le pa lotaa pquia zdoo Dios luu, zha nactaa milagr nroob ne been̄ me beenguiac me luu.

²⁰Dzigo wbire mgui. Güey mgui dib xtan zha Decápolis, güeyzodiidz mgui lo grē miech co zha beenguiac Jesús mgui. Grēse zha ne rona, rzee zdoo zho.

Brieēban xpēdwnaa tib men̄ lē Jair

(Mt. 9:18-26; Lc. 8:40-56)

²¹Zeenē laa Jesús biire brieēquia stib nēz ro nisdoo co, miech guizhiu ne pcaalsa lo me ga. ²²Ga zo me zeenē laa tib men̄ ne nacgrē zha ne rnabey yadoo lē Jair bdzin̄. Zigne bdzin̄ me lo Jesús pquitsgzh̄ib me, ²³rēb me:

—Been̄ tib guieIn̄zaac gotsaa guio ne gunguiac luu xpēēd naa. Laa win rlozhle; nappaa naa tel̄ne cxobnia luu guic win, ziac win.

²⁴Dzigo laa Jesús zie nēz lidz men̄ co. Ndal miech ne zienal̄ zhits me, haxta rtaagw zho me. ²⁵Lad grē miech co zienal̄ tib wnaa, gocle tsiipchop iz rlan me tib guiel̄guidz, rzac me zigne rzac men̄ wnaa gzob mēē, tibaque rlan mew ib rbēzda. ²⁶Nzianle lo men̄ ne run̄ rmed ziye me, grēse ncuanē rap me bloozh me lo rmed; per laa ne cuēz guiel̄guidz co, lel̄ znu rzhizhooraaw. ²⁷⁻²⁸Ziyonle me grē milagr ne run̄ Jesús. Bza zdoo me rēb me: “Totsaque ygaa maase lad

lar ne mbix me xeen naa, ziacle naa.” Dzigo bded me lad grē miech co, wbig gax me nēz zhits Jesús, bzhen me lad lar ne mbix Jesús. ²⁹Nligaa hor cogazh laa guielguidz co blēz, bien me laa me biac.

³⁰Zeene bien Jesús ne laa me beenguiac wnaa co, dzigo ptsire lo me rwi me lo grē miech co, rēb me lo zho:

—¿Cho ga bzhen lad xab naa?

³¹Rēbchaa xpēēdscuel me:

—¿Zha nan luu glu dien cho bzhen lad xab luu, ni squitaa ndaagw ziaad luu lad grē miech qui?

³²Per laa me rwi lo grē miech co dien chow. ³³Nanpaa wnaa co ne me ga, rdzieb me, rzhidz me laa me wbig pquitsgzhib me lo Jesús bneeli me zha nacne sca been me. ³⁴Dzigo rēbchaa Jesús lo me:

—Xin, laa luu biac sacne bliladz luu naa. Bzē na, peet tsieniedraa guic luu, laa guielguidz co bichele.

³⁵Laa Jesús bii quianeeque, zeene laa bla zha ne ziaad nēz lidz Jair bdzin, rēb zho lo Jair:

—Csodziindraa luu lo men qui, laa xpēēd luu gutle.

³⁶Zeene gon Jesús sca rēb zha co, dzigo bnee me lo Jair rēb me:

—Peet tsienied guic luu. Dib zdoo luu bliladz naa.

³⁷Psaandraa me cho grē miech co nienal zhits me, loxaque Pedr, Jacob ni Juan bets Jacob; zha cose zienie me.

³⁸Zeene bdzin zho lidz men co, tib ruid ne rac, nguiedz zēēb tsi zho roon zho no zho xquielnē mēēd co. ³⁹Dzigo bzēēb Jesús len yu, rēb me lo zho:

—¿Pe nacne squitaa roon to? Goonde to, gon led gute ndzooop win rii, nixguies ndzooop.

⁴⁰Le_l rzhidznie grē miech co me, bin zho sca rēb me. Dzigo bnabey me brieē zho ley grēse zho, loxaque pxoz mēēd co, xnīaa win ni gza tson xpēēdscuel me zha ne nal zhits me ga bzēēbnie me len yu ne nix win. ⁴¹Wbig me bzhen me nīa win, rēb me lo win:

—¿Guche i na, ndzooop yeen! (Talita, cumi.)

⁴²Zigne sca bnee me laa mēēd co guche, laa win bzē. Tib mēēd tsiipchop iza. Grēse miech co per nli rzee zdoo zho. ⁴³Dzigo pso me diidz lo zho choot lo gneed zhow; blozh ga bnabey me bdeed zho ncuane dow mēēd co.

Güey Jesús ladz me

(Mt. 13:53-58; Lc. 4:16-30)

6 Ga brieē Jesús grē xpēēdscuel me, laa me bdzin Nazaret zaatne nac ladz me.

²Laa zeene gol dze ne rdziiladz zho lo dziin, laa me bdzin len yadoo, psilo me pseed me grē miech co. Per nli rzee zdoo zho ron zho grē minē rnee me, rnabdiidzlsa zho rnee zho:

—¿Pazhe waa squitaa pseed men qui? ¿Zha nac guielbiini ne squitaa rap me i, ne rnee miech ndal grē milagr ne run me? ³Tib ngurēyagse name nac

me. Led lëë xingan Marí i, bets me name nac Jacob, nac José, nac Judas ni Simón, grë bzian mew, nu no zho grë zho.

Ib been_{casd} zho me. ⁴Zeene gon me sca rac zho, dzigo rëb me lo zho:

—Zha ne rteed xtiidz Dios, mazd wen rnee miech lo zho stib dan, stib guiedz, lëdle ladz zho, ni menlidz zho ni menladz zho nëd gunbey zho.

⁵Brieelod niun me nzian milagr ga, blase zha rzacnë pxobnia me guic, beenguiac me. ⁶Bzee zdoo me gon me scataa ndip zdoo zho, ib bliladzd zho cho nac me.

Blozh ga mazd güey me grë guiedz ne ndxie gax ga, güeyseed me miech.

Pxeel Jesús xpëëdsuel me tsieseed zho miech

(Mt. 10:5-15; Lc. 9:1-6)

⁷Tib dze, bredz me gza tsiipchop xpëëdsuel me, bnabey me zho tsieseed zho miech. Pxeel me zho chopga chopga zho, ni bdeed me poder lo zho par guncxoon zho mendox. ⁸Pso me diidz lo zho güeyd zho pe yquiin zho nëz, lëë gdib tib lë yag ne gzoxca zho güey zho. Zig nac ncuaa_{ne} gow zho, zig nac dimi, pe tib bzuiudгаа, güeyd zhow. ⁹Lab zho, mine quiase ni zho; xab zho, mine nacwse zho mincose tsienie zho. ¹⁰Ni rëb me lo zho:

—Guiedz ne gdzi_n to, zha ne gneedz zaatne cuëz to, lidz zha co golcuëz haxta gdzi_n dze ne gbi to guiedz co. ¹¹Laa zaatne ne ib gneedzd zho pa cuëz to, niicle nëdgaa zho yquiaadiag zho mine gnee to, dzigo gollit grë yudie co ni to, golriiegazh ga, zeena guien zho ganle lëda ga been zho.

¹²Dzigo laa zho brieë, laa zho zie. Güey zho, güeynee zho lo grë miech csaan zho xquie_{int}seeb zho, gbig zho lo Dios. ¹³Nzian zha ne nosacsi mendox, be_{ncxoon} zho mendox co; grë zha ne rzacnë, bdëëb zho nceit guic zho, beenguiac zho zho.

Gut Juan Bautist

(Mt. 14:1-12; Lc. 9:7-9)

¹⁴Bin rey Herod rzeet zho Jesús, sac tel pa lotaaw zëëb diidz grëtaa milagr ne run me. Grë miech co, no zho rzac brieëban Juan Bautist lëë me ga nac Jesús, gane run me grëtaa milagr co; ¹⁵nogaa zho rnee Líw, men ne biaad pteed Xtiidz Dios padzeela; zzhisгаа zho rnee, no cho stib men ne ziaad noteed Xtiidz Diosa, zig biaad grë zha ne biaad padzeela.

¹⁶Zeene ron Herod sca rnee miech, dzigo rnee me:

—Nligaa Juan ga. Naa bnabey pchug zho yan me, per lëë me ga brieëban.

¹⁷⁻¹⁸Sca rnee Herod sac rsoladz me zha been me Juan. Me bnabey bgaa Juan bio Juan ladzguuib, loxaque ne rnee Juan lo me nongui_{lda} ga lëëque Herodí ptsieelnia me; sac tsieelpaa bets me Lip nac Herodí.

¹⁹Blëënie wnaa ne nac Herodí ga Juan, rzac me tebaa zha gut me Juan; per rdeetew diidz, ²⁰sac rdzieb Herod lega pe gun me Juan, rien me tib zha ne zien_l mine nac diidzli, tib zha ne peet xtold nac Juan; dzigo ib rdeete me diidz pe gun wnaa co Juan. Niicle ne cadque zeene rnee Juan lo me, rio me

zhgab riend me dien zha guñ me, per rdziladz me rquiaadiag me grë mine rnee Juan.

²¹Laa tibtaa dze laa mine no guic Herodí ga goc. Dze ne bloozh Herod stib iz, bnabey Herod goc tib lni nroob, bredz me grë zha ne nacie me dziin, grë zha ne zo lo menguiib, ni grë zha non lo zha Galilé. ²²⁻²³Laa zho no mezh noyow zho, zeene bzëëb xindzooop Herodí psilo ndzooop biee ndzooop. Bdziladz Herod gon me zha biee ndzooop, grë zha ne zob lo mezh ga ne. Dzigo rëb Herod lo ndzooop, tel petaa gnab ndzooop zdeed mew; haxta brieë ro me rëb me:

—Ncuaane gacladztaa luu gnab luu, niicle zig grol grë ncuaane rap naaw, znedz naaw.

²⁴Rias ndzooop güeynabdiidz ndzooop lo xniaa ndzooop. Dzigo rëbchaa me lo ndzooop:

—Bnab lo me gnabey me tsiechug zho guic Juan gneedz zhow lo luu.

²⁵Bdzin ndzooop lo Herod rëb ndzooop:

—Racladz naa xoob guic Juan Bautist tib len plat, gneedz luuw lo naa niinagazh.

²⁶Zeene bin Herod sca rëb ndzooop, mbanse rac me; per rdeetraaw diidz niab me grieeloda, sac grëse zha ne zobnie me ga, bin zho rëb me zdeed me ncuaane gnabtaa ndzooop. ²⁷Dzigo racse me pxeel me tib menguiib ne tsiechug guic Juan.

²⁸Güey menguiib co len ladzguuib pchug zho guic Juan. Bdzin zho, zhoobsew tib len plat bdeed zhow lo ndzooop, dzigo güey ndzooop güeydeed ndzooopa lo xniaa ndzooop.

²⁹Zeene bin xpëëdsuel Juana, dzigo güey zho güeylis zho me ga güeyqueets zho me.

Bguiaan Jesús gaay mil miech

(Mt. 14:13-21; Lc. 9:10-17; Jn. 6:1-14)

³⁰Zeene laa gza xpëëdsuel Jesús bdzin lo me stib, psilo zho bzodiidz zho lo me grëse tel zha güey zho, grëse tel zha güeyseed zho miech. Per miech guizhiu ne ndxie lo me, zha ne rbi, zha ne rdzin; haxta ni riobd gow me grë xpëëdsuel me. Dzigo rëb me lo zho:

³¹—Mazd golgotsaa guio ne tib zaatne zitlaa lo grë miech rii, zeena grielo gdziiladz to niip.

³²Dzigo bzëëb me tib len barcw grë me zho, laa zho zie. ³³Nzian zha ne gon zie me, beenbey zho ne mew. Dzigo ndal miech ne no grë guiedz gax co brieë, rias zho zie zho glole zho bdzin zaatne no gdzin me. ³⁴Zeene biet me len barcw, gon me laa grë miech guizhiu co ndxiele ga. Pquia zdo me zho gon me scataa ndxie zho zootle grë mëcwxiil yeen ne guiend xbaxtor, dzigo psilo me nzian grë ncuaane pseed me zho.

³⁵⁻³⁶Gol bdze dze co, wbig xpëëdsuel me lo me rëb zho:

—Mazd gudz lo grë miech qui guey zho na, zeena guiob tsie zho grë guiedz ne ndxie dib gax i, tsiesi zho ncuaane gow zho; sac gon laa dze bdzele, ni choot miech guiend nu.

³⁷Pquiab me rëb me lo zho:

—To goldeed ncuaaṅe gow zho.

Rëbchaa zho lo me:

—¿Pe zhizhe dimi ne yquiin gziuu guietxtil ne gow grëtaa miech qui?

³⁸Dzigo bñabdiidz me lo zho, rëb me:

—¿Bla guietxtil ziaadnie to? ¡Golwi dien!

Zeene biire zho güeyso zho, rëbchaa zho lo me:

—Loxaque gaay guietxtil ziaad, ni ziaad chop me!

³⁹Dzigo bnabey me bzob grë miech co, wdzeepaaw bioogse lo guizh nguia ne zëëb ga ndxie zho. Tib dzoonga tib dzoonga zho bre, ⁴⁰zaatne bre tib gayoo zho, zaatne bregaa gro! gayoo zho.

⁴¹Dzigo bzheñ me gza gaay guietxtil co, ni grop me! co, blis lo me bui me nëz gbaa, bdeed me xquizh lo Dios. Blozh ga, beengro! me guietxtil co, zigse rdeed mew lo xpëëdscuel me, scase scase noguiz zhow lo grë miech co. Scaque been me grop me! co. ⁴²Grëse miech co, dow zho haxta zaatne bieltaa zdoos zho. ⁴³⁻⁴⁴Miech tafa, zha bguise rgaa zig gaay mil; ni zeene blozh dow zho, scase ncuaaṅe nroob biaan, biodzë tsiipchop chicuid bio grë guietxtil co, bio grë me! co.

Rzë Jesús lo nisdoo

(Mt. 14:22-27, 34-36; Jn. 6:16-21)

⁴⁵Zeene blozh ga, bnabey Jesús xpëëdscuel me bzëëb zho len barcw, zeena zienerga zho tedquia zho stib nëz ro nis co, gdziñ zho guiedz ne lë Betsaid; laa me bii blëz ga, nozonëz me grë miech co. ⁴⁶Blozhse bzonëz me zho, dzigo güey me tib guic gui zob gax ga, güeyzodiidznie me Dios.

⁴⁷Zig rguets liuw, laa barcw ne zie xpëëdscuel me ga no lo nis co. Laa me zo ga tipse me, ⁴⁸ran me rlu ib gacd csëëniob zhow, sac rriee me rtsire mew. Merle guimbe liuw, tibaque zeene gon zho laa me bdziñ zaatne zie zho ga; tib lo nis co ziezë me, rac me zig nac zeene tibted me lo zho.

⁴⁹Zeene gon zho laa men co sca ziaad-zë lo nis co, bdzieb zho, broptsie zho rnee zho:

—¡Tib ndziin i gon ziaad i!

⁵⁰Sac grëse zho ranlo zho laa me sca ziezë lo nis co. Dzigo bnee me lo zho rëb me:

—¡Gdziebde to, naa zial nu!

⁵¹Zeene laa me biep len barcw ne zie zho ga, laa me co blëz; dzigo mazdraa bzee zdoos zho. ⁵²¡Per ib riend zho cho nac me, niicle ne gonle zho been me milagr nroob co bguiaan me miech guizhiu co!

⁵³Zeene laa zho bdziñ stib nëz ro nis co, zaatne nac xtan zha Genesaret, dzigo laa zho pxidoo xbarcw zho ro nis ga. ⁵⁴Loxaque biet me len barcw laa grë miech co beenbeyle me. ⁵⁵Rias zho güey zho grë guiedz co, güeynie zho diidz laa me bdziñ ga. Dzigo psilo grë miech co rxob zho zhimguidz zho lo yag, rdziñnie zho zho lo me zaatne rontaa zho no me. ⁵⁶Zaatne gdziñtaa

me, niicle guiedz nrooba, niicle guiedz lasa, rbee grè miech co zhimguidz zho rienie zho zho zaatne nac len guiedz; ga r nab zho lo me siguiel me maase ni lar ne mbixse me xen grè men rzacnë co. Ni grëse zha ne rzhen xab me, riac zho.

Ncuaane runctal xtol miech

(Mt. 15:1-20)

7 Tib dze, bdziñ bla zha farisé, ni zla maistr ley ne ziaad nëz Jerusalén, lo Jesús. ²Dzigo gon zho blalaa zha ne nac xpëëdsuel Jesús, zeene laa zho row rguuibd zho nia zho zigne nacpaa grè zhiwseed xmengol zho.

³(Nac zha farisé, ni grësegaa zha Israel telne tsard nia zho zigne nac xcostumbr xmengol zho, ible rowd zho; sac zianałdox zho mine nac costumbr. ⁴Zeene rbire zho lo lgui, ib no mod ne riar nia zho dzigoraa rzob zho row zho. Nzian grè wseed co psan xmengol zho zianał zho, zig nac zha riar grè tas, grè cant, grè xtsiin rotie zho mine niaa guuib, ni grè lo bangw ne rzob zho row zho.)

⁵Dzigo rëb zho lo Jesús:

—¿Pe nacne zianałd xpëëdsuel luu mine blu xmengol ne? ¿Pe nacne squize nia beed zho i row zho?

⁶Pquiab Jesús rëb me lo zho:

—Nlipaa mine bnee Isá, men ne biaad pteed Xtiidz Dios, zeene znu pquiaa me: Grè miech rii, rquiaalose zho runnon zho naa, rond zho diidz gun zho mine rnabey naa.

⁷Paat rquiind riaad zho riaadgan zho naa;

sac niapse guicle zho riab grè wseed ne quialu zho lo miech.

⁸Sac tel to gon, nosaan to grè mine rnabey Dios, lel grè xcostumbr miech zianał to.

⁹Xcostumbr to nac mine mazdraa rioxco to, laa mine rnabey Dios quiasan to tib lad. ¹⁰Led znu gon rnee ley ne bdeed Dios lo Moisés: “Gon pxoz luu, gon xniaa luu”, ni no stib mine rnee: “Zha ne quie pxoz, quiegaa xniaa, ib none guet zho.” ¹¹Laa to lel rnee to, zac gund miech xyudar xmengol zho, telne bloogonle zho pe nac ncuaane rieguial gdeed zho lo me. ¹²Tole rdeete diidz ga gun zho xyudar pxoz zho, xyudar xniaa zho. ¹³Tib ladle gon rsan to Xley Dios ga sca run to, lëëpaaze grè costumbr ne biaannie to, ni quiasangaa to lo zha ne ziaadquia, min co noxcoraa to. Ni nzianraa grè falt ne squi quiaayun to.

¹⁴Dzigo bnee me lo grëraa miech ne ndxie ga, rëb me lo zho:

—Golquiaadiag mine gni naa lo to nu, ni goltsoxco guien to zha naca. ¹⁵⁻¹⁶Golgacnan ganle: Grè ncuaane rdzin zdoo miech, led mincod runctal xtol zho; sinque grè ncuaane ntseeb ne rza zdoo zho, min co nac mine runctal xtol zho.

¹⁷Laa zeene laa me bdziñ ro yu grè xpëëdsuel me, dzigo bnaabdiidz zho lo me dien zha nac diidz ne sca rëb me lo grè miech co. ¹⁸Rëbchaa me lo zho:

—¿Pe niicle to riendaquew dzigo lëë? ¿Pe riende to, grè ncuaane row miech, led mincod runctal xtol zho? ¹⁹Sac grè ncuaane row

zho rdziṇda leṇ zdoomban zho, zhaa zaatne rdziṇa. Grë guielwagw, leṇ bziuud zdoose zho, leṇ zhitripse zho rieteda, rlozh ga rriegaw xcuerp zho.

Ga blu me lo zho ganle, grëse ncuaaṇe nac guielwagw lëda runctal xtol miech. ²⁰Ni rëb me lo zho:

—Miṇe rza zdoomban miech, miṇ co nac miṇe runctal xtol zho. ²¹Sac zdoomban zho rza grë ncuaaṇe ntseeb ne ruṇ zho, zig nac:

zeṇe rio zho grë zhgab yozh,

zeṇe ruṇ zho grë guielyozh,

zeṇe rban zho,

zeṇe rut zho samiech zho,

²²zeṇe rionie zho zha ne nacd tsieeld zho,

zeṇe rzoobladz zho ncuaaṇe rap stib miech,

zeṇe ruṇ zho grë guielntseeb,

zeṇe rquidie zho,

zeṇe rien zho ruṇ zho grë ncuaaṇe ndzinlid,

zeṇe në rac zdo zho raṇ zho cho zha ne stib noded,

zeṇe rzhixcuaa zho diidzguizh,

zeṇe racniats zho,

zeṇe ruṇ zho grëraa ncuaaṇe paat rquiind.

²³Grëse ncuaaṇe ntseeb rii, zdoomban miech rzaw, ni lëw nac miṇe runctal xtol zho.

Biac xpëed tib wnaa zit

(Mt. 15:21-28)

²⁴Ga brie e Jesús, laa me zie nëz Tiro. Zeṇe bdziṇ me nëz co ga bdziel tib yu ne blëz me, gocladz me choot niacnand ne laa me no ga; per brieeloda, znuse bien diidza.

²⁵⁻²⁶Zeṇe bin tib wnaa Sirofenis laa Jesús bdziṇ ga, dzigo güey me, sac noguitnie mendox tib xpëed me. Zigne bdziṇ me pquitsgzhib me lo Jesús, rnab me tsiegunxoon Jesús mendox co. Tib wnaa zit nac wnaa co; ²⁷dzigo rëbchaa Jesús lo me:

—Blëz niip dien. None glo mëed gow, nonguielda cuee ne quiet nia mëed gdeed new lo mëcw.

²⁸Pquiab wnaa co, rëb me:

—Nli scaw, zigne rnee luu i; per niicle mëcwa led rio ma zhan mezh rtop ma grë miṇe rrieengaa nia mëed.

²⁹Dzigo rëbchaa Jesús:

—¡Squi wagon! Lëëgazha i rnee luu. Peet tsieniedraa guic luu naa sca; bzë, laa mendox ne nosacsi xpëed luu bichele.

³⁰Laa wnaa co zey. Zeṇe bdziṇ me lidz me, gon me iṇe laa xpëed me nixse lo lon, per laa mendox co psaanle win.

Biac tib meñ ne rcuaat

³¹Ga briece Jesús, güeyted me nöz Sidón. Sidón briece me bdziñ me ro Nisdoo Galilé stib, zaatne nac xtan zha Decápolis. ³²Ga bdziñnie zho tib mgui lo me, rcuaat mgui ni nca rnee mgui; bñab zho lo me cxobnia me guic mgui gunguiac me mgui.

³³Dzigo blee me mgui lad grē miech ne ndxie ga. Zitlaa güeynie me mgui, ga psēēb me mzhugnia me gropse leñ diag mgui ni bdēēb me zhinzuc me lo ludz mgui. ³⁴Blozh ga, blis lo me bui me nöz gbaa, bneeladz zdoo me, dzigo rēb me:

—¡Bzhial! (¡Efata!)

³⁵Zigne sca bnee me, laa diag mgui co bzhial, niicle ludz mguiw laaw wban, laa mgui psilo bneenal. ³⁶Dzigo pso Jesús diidz lo grē miech co, choot lo gzodiidzd zho zha biac mgui co.

Per laa ne rso me diidz lo zho, dzigole nēzrii, nēzrec rzodiidz zhow; ³⁷sac rzedox zdoo zho gon zho miñe beēñ me ga.

—¡Ncuaane gzee zdoo ne i beēñ meñ qui! —rnee zho—. Zha haxta nguuaat, haxta ngop, runguiac me.

Bguiaañ Jesús tap mil miech

(Mt. 15:32-39)

8 Leñ dze co, miech guizhiu ne biire pcaalsa lo Jesús stib. Zeene goc tson ngbidza, guiendraa ncuaane gow zho. Dzigo bredz me xpēēdsuel me, rēb me lo zho:

²—Rquia zdoo naa grē miech rii, tsonle ngbidz ga rac blanso zho nu, ni na quianiedraa zho ncuaane gow zho. ³Telne squise zho gzonēz naa zho, glēbd zho, scow zho nēz, sac no zho zit briece zho ziaad zho nu.

⁴Pquiab zho rēb zho:

—¿Per pe yguiaañ ne zho? ¿Pa guioxi ne guietxtil ne gow grētaa miech qui dan rii, naca zaatne guiend miech?

⁵Dzigo bnabdiidz me lo zho, rēb me:

—¿Bla guietxtil ziaadnie to i?

—Gadzaquew —rēb zho.

⁶Dzigo bnabey me grēse miech co bzob zho liu. Blozh ga bzhen me gza guietxtil co, bdeed me xquizh lo Dios; blozhse bdeed me xquizh lo Dios, zigse noyungrol mew, scase scase rdeed mew lo xpēēdsuel me rguizh zhow lo grē miech co. ⁷Zienie zho zla mel las; bzhen me gza mel co bdeed me xquizh lo Dios, blozh ga bnabeyaque me zho bdiiz zho ma.

⁸⁻⁹Grēse miech co, dow zho haxta zaatne bieltaa zho dzigo laa me bzonēz zho. Rga zho maase tap mil, ni zeene blozh dow zho bii bdop gadz chicuid miñe biaan.

¹⁰Blozh ga, laa me bzēēb leñ barcw grē xpēēdsuel me, laa zho zie nöz xtan zha Dalmanut.

Racladz zha farisé gan zho milagr

(Mt. 16:1-12; Lc. 12:54-56)

¹¹Blalaa zha farisé ne no nêz co, zeene bin zho laa me bdziñ ladz zho, güey zho rzadraa ncuaañe rlisqui zho lo me. Rnab zho glu me cho nac me, rëb zho lo me:

—Racladz no dzianlo no gun luu tib milagr, telne nli gbaa ziaad luu.

¹²Zeene gon me sca rac zho, bio me guielñë; dzigo haxta bneeladz zdoo me, rëb me lo zho:

—¿Zha rnaraa milagr ne racladz to gan to? Gneli naa lo to ganle, ni stib milagr gon gandraa to.

¹³Blozhse sca rëb me lo zho, ndxieque zho ga laa me bzëëb len barcw laa me zie stib nêz ro nis co.

¹⁴Zeene brie zho ga, zoladz xpëëdscuel me ney zho ncuaañe niow zho, lëe gdib tib quietxtil zienie zho len barcw. ¹⁵Laa zho zie, tibaque zeene rëb me lo zho:

—Golguien gon, napaa noyac-wet to lo zhincobi zha farisé, lo zhincobigaa rey Herod.

¹⁶Zeene bin zho sca rëb me, bza zdoo zho rnee zho:

—Ne gon me nagon ziaadnied ne quietxtil gane squi rnee me.

¹⁷Bien me sca rnee zho, dzigo rëbchaa me lo zho:

—¿Pe nacne rnee to ziaadniede to quietxtil? ¿Riende to lëe zha rne naa? Ndip nac zdoo to gane riende tow. ¹⁸¿Pa rquiin lo to, pa rquiin diag to ne laaw zob? ¹⁹¿Pe rsoladzde to zeene gaayaque quietxtil ni bgaaw bguian naa gaay mil miech? ¿Bla chicuid biodzë mine biaan hor co?

Pquiab zho rëb zho:

—Tsiipchopa.

²⁰Dzigo rëbchaa me:

—Zeene waa gadzaque quietxtil co, ni bguian naa tap mil miech, ¿bla chicuida biaan?

—Gadz chicuida —rëb zho.

²¹Dzigo rëb me lo zho:

—¿Pe niicle nana riendaque to pe rne naa?

Biac tib men ne rcow lo

²²Bdziñ Jesús guiedz ne lë Betsaid, ga güeynie zho tib mgui ne rcow lo lo me, bnaab zho cxobnia me guic mgui gunguiac me mgui. ²³Dzigo bzhen me nia mgui güeynie me mgui zaatne nacle ro guiedz co. Ga bdëëb me zhindzuc me len bziaalo mgui, ni pquiaania me zhits guidlo mgui; blozh ga bnaabdiid me lo mgui dien pe ranle mgui palal.

²⁴Zeene laa mgui bui, rëbchaa mgui:

—Ranle naa niina nagon laa miech ziezë; per masaque ran naa zho zig rlu grë yag.

²⁵Dzigo biire pquiaania me zhits lo mgui. Zeene laa mgui bui stib, ndiple rwi mgui laa lo mgui biacle. Grëse ncuaa_{ne} ra_n mgui, niicle zitraaw niini ra_n mguiw.

²⁶Dzigo bzonëz Jesús mgui nëz lidz mgui, pso me diidz lo mgui tib nëz guey mgui, choot lo tsiezodiidzd mguiw lad guiedz.

Bnee Pedr cho nac Jesús

(Mt. 16:13-20; Lc. 9:18-21)

²⁷Blozhse ga, laa Jesús brie_e ga grë xpëëds_{cuel} me laa zho zie nëz Cesarea de Filipo, zieted zho grë guiedz las ne ndxie nëz co. Laa zho no nëz, tibaque zeene bnabdiidz me rëb me lo zho:

—¿Cho dien_n ron to rnee miech nac naa?

²⁸Pquiab zho, rëb zho:

—No zho rnee Juan Bautista, no zho rnee Líw, men_n ne biadteed xtiidz Dios padzeela; nogaa zho rnee no cho stib men_n ne ziadteed xtiidz Dios.

²⁹Dzigo rëb me lo zho:

—¿To waa, cho rzac to nac naa?

Pquiab Pedr, rëb Pedr lo me:

—¡Luu nac Men_n ne zëëble diidz ga cxeel Dios guiaad lo guidzliu!

³⁰Dzigo pso me diidz lo zho choot lo gneed zhow.

Bzeet Jesús zha gu_n miech me

(Mt. 16:21-28; Lc. 9:22-27)

³¹Bded ga, psilo Jesús bzeet me lo grë xpëëds_{cuel} me zha csacsi miech me. Rëb me nroob grë ncuaa_{ne} cteed zho me; grë zha non lo menguiedz, grë pxoz nroob, grë zha ne rseed miech ley, ible stsidil_i zho me, ni haxta zut zho me; per zeene gac tson_n ngbidz gut me laa me greeban. ³²Grëse min_e ted me, laaw nozodiidz me lo zho.

Gon_n Pedr sca rnee me, dzigo bredz Pedr me, blisqui Pedr lo me dien_n pe nacle rnee me laa me guet. ³³Zeene gon_n me zha rzë xtiidz Pedr, zoque Pedr ga, biecw me bui me lo grëraa xpëëds_{cuel} me, goctox me rëb me:

—¡Biche lo naa nu mendox! Zienied guic luu min_e rnabey Dios, sinque laa guic luu zienie min_e racladz luu.

³⁴Dzigo blunia me lo grë miech ne ndxie ga, yquiaadiag zho min_e gnee me; rëb me:

—Zha ne racladz sëëb xnëz naa, none cueeladz zho zho, none lëb zho guiaadna_i zho min_e rnabey naa, niicle tel_i min_n co yquiaaqui csacsi miech zho. Nodne yquia zdoos zho xquiel_mban zho. ³⁵Sac zha ne yquia zdoos xquiel_mban, lel_i znu nitlo zho; sangue zha ne sca cueeladz xquiel_mban porne rleynie zho naa, porne rleynie zho grë Diidz Ndzon rii, zha co ygaa tib guiel_mban ne mazdraa ndzon. ³⁶Nana, tel_i zha ne gunlogaa grëse ncuaa_{ne} no lo guidzliu rii, ¿pa dien_n yquiin grë ncuaa_n co lo zho, tel_i lëew yquiaaqui laa zho guey gabil_i? ³⁷¿Niacxe zrieelo gdziib zho dimi co laa zho len_n gabil_i? ³⁸Naa ne nac

naa Men ne pxeel Dios zial naa lo guidzliu, zha ne ctoladz guiab zho lo grè miech ngoopdol rii laa zho no xnëz naa, o ctoladzniegaa zho xtidz naa, scaque naa stoladznie naa zho gal dze ne laa naa guial stib. Dze ne guialnie naa grè anjl, ni glu naa grè guieindzon ne rap Dios.

9 Ni rëb me lo grè miech co:

—Gneli naa lo to ganle, nzian grè zha ne ndxie nu niina ib tedsod gardaque guet zho, bii zan zho ganle zeene laa Dios glu ne nli men rnabey nac me.

Bdzëëlo Jesús

(Mt. 17:1-13; Lc. 9:28-36)

²Goca xoop ngbidz, brieë Jesús gza me Pedr, Jacob ni Juan, güey zho bzoquia zho tib guic gui glaa.

Bdzin zho glaa guic gui co, tibaque zeene gon zho laa me bdzëëlo. ³Masaque rquiabni xab me, nquitsbie rnaw; ni tib miech grielod scataa mbe quiib lar. ⁴Gonlo zho zeene laa Lí ni Moisés (grop zha ne biadteed xtiidz Dios glo) bdzinaque, laa zho nozodiidznie me. ⁵Dzigo rëbchaa Pedr lo me:

—Maestro, jne nligaa wena guiaan ne nu! Laa no gzaa tson yu yag xiid win nu tso to: tiba tso luu, tiba tso Moisés, stiba tso Lí.

⁶Rdzieb Pedr gza Pedr schop zha co, lo dzeb co niicle riendaque Pedr pe rnee Pedr. ⁷Tibaque znuse bdop tib xcow pquia ngali zaatne zo zho ga; dzigo bin zho zëëb tib tsi men co lo xcow co, rnee me:

—Lëë xpëed naa i gon, rleynie naa me. Golgon mine rnee me.

⁸Lëëled biecw lo zho rwi zho, choot gondraa zho, Jesússe zo lo zho ga.

⁹Blozhse ga, laa zho wbique ga. Laa zho ziezëëb dan noyet zho cho gui co, zeene rëb me lo zho:

—Mine gon to gon, choot lo gneede tow. Golcuëz haxta gal dze ne grieeban Men ne pxeel Dios.

¹⁰Nacne choot lo bneed zhow, per psilo zho gza tson zho rnabdiidzlsa zho, zha mod grieeban tib zha ne gutle.

¹¹Dzigo bnabdiidz zho lo me, rëb zho:

—¿Bay zha nacne rnee maistr ley, glo Lí no guiaad stib, dzigora a guiaad Men ne zëëble diidz ga cxeel Dios?

¹²⁻¹³Pquiab me rëb me lo zho:

—Nliw, ible nacle diidz ne glo Lí guiadseed miech gon zho xtiidz Dios, per laa me biaadle; ni zigne bzeetse grè zha ne biadteed xtiidz Dios ted me, scase been miech me. Scaque Men ne cxeel Dios ga, rnee lo Xtiidz Dios nroob csacsi miech me, ible gandzed zho me.

Biac tib niib ngop

(Mt. 17:14-21; Lc. 9:37-43)

¹⁴Zeene bdzin Jesús zaatne biaan grëraa xpëëdsuel me ga, gza me Pedr Jacob ni Juan; gon zho miech guizhiu ne ndxie lo zho; blalaa zha ne nac

maistr ley zo lo zho ga, nodiidiidznie zho. ¹⁵Grë miech co, zeene gon zho Jesús, rley zho, rias zho güeydzieelo zho me güeyquiaa bdiuzh zho me. ¹⁶Dzigo bnabdiidz me rëb me:

—¿Pe nadien squitaa nodiidiidz to?

¹⁷Lad grë miech co pquiab tib zho, rëb:

—Maestro, lo luu zialnie naa tib xpëed naa gunguiac luu win; ib gacd gnee win sac noguitnie mendox win. ¹⁸Tel pataa zo win, zeene laa ma rzëeb zdoo win rron ma win liu; ga nix win rdzib mtsiin ro win, ni row lay win; nrooble noyo win lëbdraa win së win. Blansonie naa win nu, dzigo bnab naa lo xpëedscuel luu guncxoon zho mendox co, per brielod zho.

¹⁹Dzigo rëbchaa Jesús lo zho:

—¿Pe na squitaa miech nad nac to, ib rnalode to Dios! ¿Palal tiemp ne so naa gne naa lo to? ¿Ncuane cexecwdraa naa lo to squi nac to! ¿Goltënie mëédwin qui nu!

²⁰Güey zho güeynie zho mëédwin co lo me. Zigne gon mendox co me, psilo beencxidz ma win, znuse biab win liu, rtiibxto win ni rdzib mtsiin ro win. ²¹Dzigo bnabdiidz me lo pxoz win, goc palal dze psilo sca rac win.

Rëbchaa pxoz win:

—Bii mëdyeen win psilo squi rac win. ²²Pe zhidaa vuelt zieron mendox qui win lo gui, zieron ma win lo nis ne, racladz ma gut ma win. Bzhiguiel telne zrieelo gunguiac luu xpëed naa, jquia zdoo naa, been tib guielnzaac beenguiac win!

²³Rëbchaa Jesús lo me:

—¿Zha rnee luu “telne zrieelow”? ¿Zha ne dib zdoo rnalo Dios, grëse ncuane racladz zho, zaca!

²⁴Lëëled pquiab pxoz mëéd co, rëb me:

—Rnalo naa Dios, per bzhiguiel been xyudar naa, jdib zdoo naa gnalo naa me!

²⁵Zeene gon Jesús laa grë miech co rbigberaa, dzigo goctox me lo mendox ne noguitnie mëéd co, rëb me:

—Mendox, luu gon psan ngop mëéd rii, luu psan nguaat win. ¿Niinagazh psaan win, ib gbiiredraa luu ygaal luu win!

²⁶Hor co biire beencxidz ma mëéd co stib, masaque roptsiedan ma laa psaan win, nixtaque win ga, zootle gutle win. Nzian grë miech co, tibaque nan zho gutle win. ²⁷Laa zeene bzhen Jesús nia win, blis me win ga, laa win bzoli.

²⁸Zeene bdzin Jesús len yu ne rbëz me grë xpëedscuel me, bnabdiidz zho lo me rëb zho:

—¿Bay pe nacne brielod no ndziuncxoon no mendox co?

²⁹Dzigo rëbchaa me lo zho:

—Grë mendox ne sca nac, rquini dib zdoo ne gnab ne lo Dios dzigo zrieelo guncxoon ne ma.

Bzeet Jesús laa miech csacsi me

(Mt. 17:22-23; Lc. 9:43-45)

³⁰⁻³¹Briee Jesús ga grë xpëédscuel me, laa zho wbire nëz xtan Galilé stib. Racladz me cho gacnañ pa lo no me; sac len̄ dze co nzian grë ncuanea noseed me zho. Haxta bzeet me zha csacsi miech me, rëb me:

—Naa ne nac naa Men̄ ne pxeel̄ Dios, ible ziaab naa ladznia miech, ni zut zho naa. Per zeene gac tson̄ ngbidz gut naa, laa naa grieeban.

³²Per ib rien̄d zho pe nacne sca rnee me, niicle gnabdiidzгаа zho rdzieb zho gnabdiidz zhow lo me.

¿Cho nonraa?

(Mt. 18:1-5; Lc. 9:46-50)

³³Bdziñ zho guiedz ne lë Capernaum; grëse zho laa zho ndxie len̄ yu ne blëz zho, tibaque bnabdiidz Jesús lo zho, rëb me:

—Golnë dien̄, ¿pe scataa nodildiidz to zeene ziaad ne nëz?

³⁴Ni tib zho ib pquiabd, sac zeene ziaad zho nëz quianeelsa zho dien̄ cho nac zha ne nonraa.

³⁵Dzigo bzob me, bredz me zho gza tsiipchop zho rëb me lo zho:

—Zha ne racladz gac zho zha non, none guiaanwin zho gac zho zig tib ngundziin lo samiech zho.

³⁶Dzigo bzo me tib mëédgui win glowtaa lo zho; blozh ga bdeedz me win, ni rëb me lo zho:

³⁷—Zha ne ngab xnëz naa, ni gleynie zho tib mëédwin zig mëédwin rii, gun naa cuent naa ga rleynie zho; ni zha ne sca rleynie naa, ye le men̄ ne pxeel̄ naa ga rleynie zho.

³⁸Blozh ga, rëbchaa Juan lo me:

—Maestro, bdzion̄ no gon̄ bzeet tib zha co lë luu zeene beñcxoon̄ zho mendox; nacne nli blisqui now lo zho, sac gon̄, led yed zho nacgrë ne.

³⁹Dzigo pquiab me rëb me lo zho:

—¡Guns̄cade to! Sac gon̄ zha ne sca rzeet lë naa zeene run̄ zho milagr, niacxe lëëque zha glëë lo naa. ⁴⁰Zha ne nacnie ne, glëéd zho lo ne.

⁴¹'Golgacnan̄ sca gan̄le, grëse zha ne gdeed maase tib zhigaque nis guie zha ne ngab lo naa, ib tedsod stsire Dios min̄e been̄ zho ga. ⁴²Sangue zha ne yguib gun̄ctal zho xtol̄ zho ne nac zho zig tib mëédlas yeen̄; mazd lëëtaa min̄e ted zha co sobdoo tib quie molin̄ zhobxtil̄ yquiaw yan̄ zho tsieron̄ zho zho nisdoo.

Choot gdeete diidz guiab lo dol̄

(Mt. 18:6-9; Lc. 17:1-2)

⁴³⁻⁴⁴'Zha ne rien̄ nia zho nac min̄e rquiaqui run̄ctal zho xtol̄ zho, mazd cchuggazh zho nia co zho. Peet nacd maase tibaque nia zho zob totsaque ygaa zho guielmban̄ ndzon ne gdziñd̄ dze lozh, lëdle zob gropa ni laa zho

guey gabil, lo bel dox ne gdziṅd dze guuu. ⁴⁵⁻⁴⁶Teṅe riengaa zho ni zho nac miṅe rquiaqui runctal zho xtoṅ zho, mazd chuggazh zho ni co zho. Peet nacd maase tibaque ni zho zob totsaque ygaa zho guieṅmban ndzon ne gdziṅd dze lozh, lèdle zob gropa ni laa zho guey gabil, lo bel dox ne gdziṅd dze guuu. ⁴⁷Teṅ tib logaa zho nac miṅe rquiaqui runctal zho xtoṅ zho, mazd cueegazh zho bziaalo co zho. Peet nacd maase tibaque bziaalo zho zob totsaque ygaa zho guieṅmban ndzon co, lèdle zob grop bziaalo zho ni laa zho guey gabil. ⁴⁸Zaatne nac gabil, ib gdziṅd dze ne guuu lo bel co; grè mziog ne ndxie ga, gdziṅd dze ne nitlo ma. ⁴⁹Grèse zha ne gdziṅ ga, masaque cuib gui lad zho zig rbib zed lad bëël.

⁵⁰Zig nac zed, rquiindoxa zeene nzhiw, per zeene nzhida, ¿pa diē yquiina? Scauegaa to nagon goṅgac zig zed ne nzhi, zeena yquiin to lo guidzliu rii; niowse goṅbannie samiech to, glèëlsade to.

Zha ne rsëbtsieel

(Mt. 19:1-12; Lc. 16:18)

10 Brie Jesus Capernaum güeyted me grè guiedz ne ndxie nēz xtan zha Judé, grè guiedz ne ndxie nēz dan ro guiubee Jordán. Miech guizhiu ne rcaalsa lo me, dzigo rsilo me rseed me zho zigne runtaque me.

²Tib vueltd bziṅ bla zha farisé gocladz zho niungüet zho me, par diē pe nxiṅd me tib diidz; bnabdiidz zho rēb zho:

—Maestro, mgui ne racladz csëbtsieel, ¿pe gnē luu pe zrieelo csëbtsieel zho?

³Pquiab me rēb me lo zho:

—¿Zha zho psan Moisés diidz lo to?

⁴Pquiab zho rēb zho:

—Teṅ Moisésa, bdeed me diidz csëbtsieel zha ne racladz csëbtsieel, lëëraasi none yquia tib guits gdeed zho lo wnaa zaatne raquiet ne laa zho psaan wnaa.

⁵Dzigo rēbchaa me lo zho:

—Ne sqicxe waa miech nad nac to ib ronde to diidz, miṅ co nacne biaan ley co. ⁶Per ib nodne csëbtsieel miech; sac goṅ, zeene psan Dios grëtaa ncuaaṅe no, tib nēz miech bzaa me: tib mgui ni tib wnaa. ⁷⁻⁸Gacxe waa, mgui ne rtsieelnia ib none griezhaa zho lo pxoz zho, lo xniaa zho, par gbannie zho wnaa ne nac tsieel zho; laa zho gactipse grop zho. Nacdrea zho chop miech, sinque laa zho rac tibaque. ⁹Dios nac men ne psan ycatsieel miech, cho dzigo nac miech par quiits zho miṅe rnabey me.

¹⁰Laa zeene bziṅ me len yu ne rbēz zho, dzigo bnabdiidzaque xpëëdscuel me miṅ co lo me stib. ¹¹Dzigo rēbchaa me lo zho:

—Mgui ne rsëbtsieel ni rbannie zho stib wnaa, noguitnie zho wnaa ne gocpaa tsieel zho ga, ni doṅ ga run zho. ¹²Niicle wnaagaaw, wnaa ne rsëbtsieel ni rbannie zho stib mgui, lëëque doṅaque ga run zho.

Beenlay Jesús mēēdlas*(Mt. 19:13-15; Lc. 18:15-17)*

¹³Tib vult nzian meṅ ne bdziṅ bdziṅnie zho xpēēdlas zho lo Jesús, par cxobnia me guic win guṅlay me win. Grē zha ne nac xpēēdscuel me, leḷ psilo zho ndox zho lo grē zha ne bdziṅnie grē mēēdlas co.

¹⁴⁻¹⁵Zeēṅ goṅ me sca quiayun zho, wbiṅladz guic me, dzigo rēb me lo zho: —Ctsirede to grē mēēdlas yeēṅ qui, goḷsaan guiaad win lo naa. Sac goṅ grē mēēdlas yeēṅ, ni zha ne nac zigne nac win, zha co nac zha ne sēēb ygab lo Dios.

¹⁶Blozhse sca bnee me, dzigo psilo me bdeedz grē mēēdlas co, ni pxobnia me guic win beenlay me win.

Bzodiidznie tib zha ricw Jesús*(Mt. 19:16-30; Lc. 18:18-30)*

¹⁷Laa Jesús nole nēz tsie me stib guiedz, zeēṅ rias tib niib nguieg bdziṅ pquiitsgzhib lo me, rēb niib lo me:

—Nan naa luu nac tib meṅ ne noseed miech, ni tib meṅ wen nac luu; ¿bnē dien pe nac miṅe guṅ naa zeēṅa ygaa naa guieḷmban ndzon ne gdzindraa dze lozh?

¹⁸Rēbchaa Jesús lo niib:

—Rnee luu lēē tib meṅ wen nac naa. ¡Nligaaw, Diosse nac meṅ wen! ¹⁹Nanle luu ganle zha nac Xley Dios, rneew:

Gute luu samiech luu,

teḷne nole tsieel luu, tsonied luu zha ne led tsieeld luu,

cuand luu samiech luu,

yquiadiidzguizhd luu samiech luu,

yquidieed luu samiech luu,

goṅ pxoz luu, goṅ xniaa luu; bin miṅe rnabey me luu.

²⁰Dzigo pquiab niib rēb niib lo me:

—Maestro, grēsew zigne bzeetse luuw i, ni tiba gard quits naa wlal ne nac naa zha nguieg.

²¹Dze rwi Jesús lo niib, rleynie me niib.

—Stibaque miṅe rquiin guṅ luu —rēb me—, güey, güeyto grēse ncuaaṅe quianie luu, dzigo bdiiz dimi co lo grē zha mban ne guieṅd pe yquiin; sca nroobraa guieḷnzaac ne ygaa luu gbaa. Lozh ga, bleeladz xquieḷmban luu dēṅaḷ zhits naa.

²²Zeēṅ bin niib co sca rēb Jesús, biab guieḷnē niib, mbanse rac niib laa niib zey; sac ne nligaa nroob ncuaaṅe quianie niib.

²³Dze rwi me goṅ me laa zha nguieg co zey, dzigo rēb me lo xpēēdscuel me:

—¡Grē zha ne squi rapchen, rzacxuu zho par sēēb zho xnēz Dios gnabey me zho!

²⁴Zeēṅ bin zho sca rēb me, rzee zdoo zho. Dzigo biire me bnee me rēb me lo zho:

—Xin, ¡ne nligaa tib miech ne ndziib rap chen, rzacxuu zho sëëb zho xnëz Dios gnabey Dios zho! ²⁵Mazd znuse rded tib camell guieer guzh, lëdle sëëb tib zha ricw xnëz Dios.

²⁶Zeene bin zho sca rëb me, mazdraa bzee zdoo zho, rnabdiidzlsa zho rnee zho:

—Bay, ¿chose dzigo nac zha ne zrieelo sëëb xnëz Dios?

²⁷Dze rwi me lo zho, dzigo rëbchaa me:

—Par miech zootle tsod zha ne grieelo sëëb xnëz me. Sangue me, nan me no zho; sac tsod ncuaane grieelod gun me.

²⁸Dzigo rëb Pedr lo me:

—Tel no, grëse ncuaane rdziaap no laa no psana, laa no ziaadnal zhits luu.

²⁹Pquiab me rëb me:

—Grëse zha ne psan lidz, psan zho bets zho, bzian zho, xniaa zho, pxoz zho, xpëed zho, liun zho, porne rliladz zho naa ni rliladz zho Xtiidz Ndzon Dios; ³⁰nli nroob guielnë gan zho, per gneli naa lo to ganle: grëse ncuaane sca psan zho ga, lo guielmban riique laa zho gbiire gana stib tib gayoogaw tib tiba; ni ib tedsod zgaa zho tib guielmban ndzon ne gdzindraa dze lozh.

³¹Nli zig nac niina, no zha ne rzac zha non nac zho, per zeene gal dze co peet gacnond zho; laa zha ne rzac zho peet nond, gal dze co lalga gac zho grë zho.

Biire bzeet Jesús laa miech csacsi me

(Mt. 20:17-28; Lc. 18:31-34)

³²Briee Jesús ga laa me zie Jerusalén. Nzian grë zha ne zienal zhits me, nerse me lo zho laa zho zie. Grë zha ne nac xpëedscuel mew, rzee zdoo zho; laa grëraa miech co per nli rdzieb zho. Dzigo bredz me gza tsiipchop zha ne nac xpëedscuel me ga, psilo me bzeet me grëse tel zha ziaadyob ted me, rëb me lo zho:

³³—Bii zan to ganle, naa ne nac naa Men ne pxeel Dios, niina ne laa ne gdzin Jerusalén ible zielo zho naa ladznia grë zha ne nac pxoz nroob ni grë zha ne rseed miech ley. Grë zha co gnab guet naa, ni san zho naa ladznia grë zha ne nacdraa zha Israel. ³⁴Xidznie zho naa, stsuc zho lo naa, zguin zho naa, ni haxta zut zho naa; per dze ne gac tson ngbidz gut naa laa naa grieeban.

³⁵Dzigo wbig gax Jacob grop Juan (xingan Zebedé) lo me, rëb zho:

—Maestro, laa no gnab tib favor lo luu, per racladz no siguiel luu gun luuw.

³⁶Dzigo rëb me:

—¿Pe favor ne racladz to gun naa lo to?

³⁷Rëbchaa zho:

—Laa no racladz, siguiel luu zioob no cue luu gal dze ne laa luu nac rey rnabey luu, tib no nëz derech stib no nëz revés.

³⁸Pquiab Jesús, rëb me lo zho:

—¡Ni to gon riend pe r nab to! ¿Pe zlëb to gan to grë guielnë ne gan naa, pe zlëb to ted to grë miñe teed naa?

³⁹Rëbchaa zho:

—¡Zlëëb no!

Dzigo rëbchaa me lo zho:

—Nli zañ to guielnë ne gan naa, ni zded to minë teed naa; ⁴⁰per ne gnedz naa diidz sob to cue naa nëz derech o nëz revésgaa, led naad raguial min co; laa lugar co biaanle par zha ne nole diidz ygaaw.

⁴¹Grëraa zha ne nac xpëédscuel me, zha ne nacgza Jacob ga grop Juan, zeene bin zho zha rzë xtiidz Jacob grop Juan blëë zho lo zho. ⁴²Dzigo bredz Jesús zho grëse zho, rëb me lo zho:

—Ran to ganle zha run grë zha ne rnabey grë guiedz ne ndxie lo guidzliu, ni grë zha ne nac zha non, masaque rnabey zho samiech zho zigne racladztaa zho. ⁴³Sanguë to gon, gunscade to. Lo gza to, zha ne racladz gac zho zha non lo to, laa ne glu zho zha non zho, none glo zho guiaanwin gac zho zig tib ngundziin lo to. ⁴⁴Scaquegaa, zha ne racladz gnabey lo to, none glo cseed zho gun zho minë gnabey to zho. ⁴⁵Golgan ganle, niicle naa ne nac naa Men ne pxeel Dios, ziald naa par gnabey naa miech, sinque laa naa zial par gac naa tib ngundziin lo zho, ni gded naa xquielmban naa zeena laa zho lo grëtaa ncuane ngadoo zho. Ni nanpaa naa miech guizhiu ne laa.

Biac tib men lë Bartimé

(Mt. 20:29-34; Lc. 18:35-43)

⁴⁶Sca no grë miech guizhiu co nëz, laa zho bdziñ guiedz Jericó. Laa zeene laa grë miech taf co zieriee ro guiedz co, laa tib mgui ciegw lë Bartimé zob ga rtop gon (xingan tib men lë Timew). ⁴⁷Zeene bin Bartimé ye Jesús (Nazaren) ziaad ga, psilo me nguiedz rbedz me, rnee me:

—¡Jesús, men xtii rey David, pquia zdoo naa!

⁴⁸Nzian grë miech co ndox lo me nan zho guioog ro me, per dzigole mazdraa nguiedz roptsie me, rnee me:

—¡Jesús, pquia zdoo naa!

⁴⁹Dzigo pcuëëzni Jesús, bnabey Jesús güeytsedz zho me. Bdziñ zho lo me, rëb zho:

—¡Ligier guso i! Dë ganle laa me rbedz luu.

⁵⁰Zeene bin mew, haxta squi bron me lar ne mbix me, guso me ga laa me bdziñ lo Jesús. ⁵¹Dzigo rëbchaa Jesús lo me:

—Bnë nadien, ¿pe racladz luu gun naa?

Pquiab me rëb me:

—Maestro, racladz naa guiac lo naa.

⁵²Dzigo rëbchaa Jesús:

—¡Ninagazh laa lo luu gan! Laa luu biac, sacne dib zdoo luu bnalo luu naa. Ligier na bzë.

Hor cogazha laa lo men co psilo bui, laa me zienal zhits Jesús.

Bdzin Jesús Jerusalén

(Mt. 21:1-11, 18-19; Lc. 19:28-40; Jn. 12:12-19)

11 Zhile gdzin zho Jerusalén, laa zho zie gax zaatne riaan guiedz Betfagé ni guiedz Betain, nêz dan squi riaan Gui Oliv, zeene bredz Jesús chop xpëédscuel me ²rêb me lo zho:

—Goltsie guiedz win ne ndxie danse lo ne i. Zigne sëëb to lad guiedz, laa tib burr quiadoo ga, ni tib miech gard sob lad ma; dzigo golxadz ma, goltënie ma nu. ³Teļ cho gnabdiidz pe nacne noxadz to ma, dzigo golguiab: men ne rnabey ne men co rquiin ma, na zigne lozh xtsiin ma guiaadsan no ma.

⁴Laa zho zie, nligaaw laa zho güeydziel burr co quiadoo ma tib ro nêz, gax tib ro yu. ⁵Blalaa zha ne zo ga, zeene gon zho laa zho noxadz ma, rêbchaa zho: —ĵPe gun to burr qui dzigo na, ne noxadz to ma?

⁶Dzigo pquiab zho zigne rêbse Jesús lo zho ga, nacne bdeed men co diidz laa zho zienie ma.

⁷Bdzinnie zho ma lo Jesús lëëque lar ne rbix zho pxob zho lad ma, bzobga me ma. ⁸Nzian grë miech co zigse zie Jesús, scase scase ner zho rta zho lar ne rbix zho rded me, nogaa zho rchoo nia grë pe yag rdziin zho zaatne rded me. ⁹Grëse zho, niicle zha ne ner lo mew, niicle zha ne nal zhits mew, rley zho nguiedz roptsie zho, rnee zho:

—Ĵha ndzontaa men qui pxeļ Dios lo ne! ¹⁰Ĵha wentaa ziaad me gac me zhirey ne! ĴMe gnabey zigne bnabey pxozgol ne rey David! ĴZha ndzontaa Dios ne zob gbaa!

Sca nguiedz roptsie zho rleynie zho me, laa me bdzin Jerusalén.

¹¹Bdzin me Jerusalén, güey me güeyso me len yadoo. Blozhse bui me dipse len yadoo, laa me brieëque ga laa me zie nêz Betain grë xpëédscuel me, sac bdzele dzew.

¹²Biini liu, loxaque zieriee zho Betain laa me psilo rcaabedz. ¹³Zitlaa ziaad me gon me tib zhan yag guigw, nxii nac low zëëb zhiblaga; dzigo zie me zieso me dien pe gdziel tib guigw low gow me. Bdzin me zaatne zoba, ni tib guigw guiend low loxaque zhiblagsew scataa zëëb, sac gardpaa gdzin mëe ne rquia guigw. ¹⁴Dzigo rêb me lo yag guigw co:

—ĴSquitaa nagon guiaan luu! ĴGdzindraa dze yquia nex lo luu gow miech! Grëse xpëédscuel me, bin zho sca bnee me lo yag co.

Blee Jesús miech len yadoo

(Mt. 21:12-17, 20-22; Lc. 19:45-48; Jn. 2:13-22)

¹⁵Bdzin zho Jerusalén, bzëëb me len yadoo. Psilo me blee me grëse miech ne quiayun lgui ga, zigtaa zha ne no wtow, zigtaa zha ne no wziw. Grë zha ne no wto palom, grë zha ne notsëë dimi, ptiixche me xmezho zho. ¹⁶Blozh ga, pso me diidz choot nodraa sëëbnie grë ncuuan co len yadoo, ¹⁷rêb me lo zho:

—Led znu gon rnee lo Xtiidz Dios: “Zaatne nac lidz naa nu, nu guiaad grëse miech ne ndxie lo guidzliu sodiidznie zho naa.” Laa to gon quiayun to lugar rii zig tib zhibliee ngbaan.

¹⁸Grë zha ne nac pxoz nroob ni grë zha ne rnabey lo maistr ley, bin zho sca rëb me, dzigo psilo zho rguib zho dien zha gdeeda diidz gut zho me. Per rdzieb zho lega gnaaz zho me, sac ndal miech ne rley rquiaadiag zhiwseed me. ¹⁹Zeene laa liu pcow, laa me wbique Jerusalén stib grë xpëedscuel me.

²⁰Biini liu co, laa zho zieded zaatne zob yag guigw ne sca güeyguib me nex lo ga, gon zho laaw bidzle dib low. ²¹Dzigo beencsoladz Pedr mew, rëb Pedr: —Maestro, bui ganle laa yag guigw ne bdzibdee luu ga bidzle.

²²Pquiab me rëb me:

—Zha ne dib zdoo rnaló Dios, ²³gneli naa lo to ganle: Niicle ncuane mazdraa ngan gnab zho lo me, zun mew; lëëraasi none dib zdoo zho gliladz zho zac mine rnee zho, ni palal gacchopd guic zho. ²⁴Golgona sca ganle, grëse ncuane gnab to lo Dios, dib zdoo to golliladz ne zneedz mew, dzigo sca zac mine r nab to. ²⁵Ni zeene gnab to lo Dios, golsoladz dien pe no cho rlëënie to, dzigo golgun zho perdon; zeena scagaa, Pxoz to men ne zob gbaa zun me to perdon tel pe nactaa xtol to. ²⁶Sac telne gunde to samiech to perdon, dzigo niicle megaa, gund me to perdon.

Cho rnabey Jesús

(Mt. 21:23-27; Lc. 20:1-8)

²⁷Blozh ga, laa zho bdzinaque Jerusalén stib. Lëëtaque laa Jesús quiawi dib len yadoo, zeene bdzin bla zha ne nac pxoz nroob, bla zha ne nac maistr ley ni zha ne nac men non lo menguedz, ²⁸rëb zho lo me:

—¿Cho dien nac luu ne squitaa ziaadnabey luu len yadoo? ¿Cho rnabey luu?

²⁹Pquiab me rëb me lo zho:

—Laa naa gun tib wnabdiidz lo to. Telne stisire to low, dzigo gni naa lo to ganle cho rnabey naa ne laa naa noyun grë ncuane noyun naa. ³⁰Golnë dien, ¿cho pxeel Juan biaad me pchoobnis me miech? ¿Pe Dios pxeel me, te miechsew ye?

³¹Psilo zho rnabdiidzlsa zho, rnee zho:

—Telne dzieets ne Dios pxeel Juan, dzigo laa me gnë: “¿Pex nac dzigo waa bliladzde to mine bnee Juan?” ³²Tel na dzieetsgaa ne: “Miechse pxeel Juan, grieequiadaque ne.”

Rdzieb zho niab zho miech pxeel Juan, sac grëse menguedz nan ne nli Dios pxeel Juan biadteed Juan xtiidz Dios lo miech. ³³Dzigo mazd mine been zho, rëb zho:

—Ndiond no dien cho pxeel Juan.

Dzigo rëbchaa me lo zho:

—Niicle naagaa nagon, grieelod gni naa lo to cho rnabey naa quiayun naa grë ncuane rii.

Xcuent zha ne pquianap liu

(Mt. 21:33-46; Lc. 20:9-19)

12 Dzigo psilo Jesús bzodiidz me tib cuent, rëb me: —Tib mgui name, nroob lbë uv beenbni me lo liun me. Psilo me ptse me igose liu co, bzaa me zaatne gzhii grë uv co, ni bzaa me tib yu glaa zaatne sob zha ne yquiaanapa. Blozh ga, blediin me liu co lo bla zha ne ran liu, dzigo laa me brieeg ga, laa me zey zit.

²Zeene gol mëë ne ral uv, pxeel me tib xmoz me lo zha ne quianap liu co, parne gdeed zho uv ne rieguiäl me ycaa me. ³Per lel bnaaz zho moz co, bdiñ zho zho; blozh ga, scase bzonëz zho zho.

⁴Dzigo biire men ne nacchen liu co pxeel me stib moz, scasaque been zho: gocntseeb zho lo moz co, pquiaago zho zho, bdiñ zho zho, blë zho guic zho.

⁵Biireque me pxeel me stib zho, zha cole beet zho. Ni bii pxeel me nzianraa zho, no zho psiwee zho, nogaa zho beet zho. ⁶Tibaque zeene loxaque xinganse me riaan. Rleyniedox me xpëed me, per laa me pxeel me, bza guic me rëb me: “Ganse zho xpëed naaw, zon zho mine gnee me.”

⁷Zeene gon zho laa xpëed me bdziñ, rëbchaa zho: “¡Lëë zha qui nagon guiaannie liu rii! ¡Golgotsaa dziuut ne zho zeene guiaana lo ne!” ⁸Dzigo bnaaz zho men co, beet zho me, güeyga zho güeyron zho me tib lad lo liu co.

⁹Sca nagon —rëb Jesús—, been zha ne quianap liu co. Golnëse nadien, ¿pe nac mine gun bizhuan liu co? Ib tedsod zeene laa me guiaad, znitlo me zha co; zhaale lo zha ne csan me liun me.

¹⁰Golsoladz ganle znu rnee lo Xtiidz Dios:

Quie ne psëeb zha ne nozaa yu,
ni nanð zho lëepaa quie co nac mine rnazdziits yu.

¹¹¡Ncuane gzee zdoos new! Sac Dios bnabey sca goca.

¹²Zeene gon zho sca bnee me, gocladz zho naazgash zho me ga; sac bien zho mine run zho ga bzeet me. Per bnaazd zho me, sac rdzieb zho grë miech guizhiu ne ndxie ga, nacne zeyga zho.

Pe nonguiel quizh miech contribucion

(Mt. 22:15-22; Lc. 20:20-26)

¹³Zhisaque goca, laa zho pxeelaque zla zha farisé, ni zla zha ne nacnie Herod, zie zho ziegungüet zho Jesús par dien zha cxin me tib diidz; zeena sca gdeeda diidz tsiezo zho me lo wxtis. ¹⁴Bdziñ zho lo me, rëb zho:

—Maestro, ndion no niapse diidzli rnee luu, led lega gund luu mine rnee tib miech, sac tibeyse nac miech lo luu, ni laa luu zianal cseed zho mine nac diidzli zeena sëeb zho xnëz Dios. Min co nagon, nacne racladz no gnë luu lo no dien, ¿pe nonguiela ga rdeed no dimi ne razh lo rey te nonguielda ye? ¿Pe dzizhrra no dimi co, te mazd dizhdraa now ye?

¹⁵Bienga Jesús racladz zho gungüet zho me, dzigo rëbchaa me lo zho:

—¿Pe nacne racladz to gungüet to naa? Golguiid tib xpes to nu ganle.

¹⁶Dzigo bdeed zho tib pes lo me. Blozh ga, rëbchaa me lo zho:
—Golnë lo naa dien, ¿cho nu quia lo pes rii? ¿Cho lë nu quia low?
Pquiab zho rëb zho:

—Lëë rey Roma i, lëë lë me i quia low.

¹⁷Dzigo rëb me lo zho:

—Mïne nonguiel ycaa rey, goldeeda lo rey; scaquegaa mïne nonguiel ycaa Dios, lo Dios goldeeda.

Zeene gon zho sca ptsire me lo xtiidz zho, rdzieldraa zho zha gun zho.

¿Pe nli zrieeban miech?

(Mt. 22:23-33; Lc. 20:27-40)

¹⁸Bdžinaque zla zha saducé, rëb zho lo me:

¹⁹—Maestro, znu pquiaa Moisés lo libr ley ne psan Moisés lo no: tel glo mgui guet lo wnaa ne nac tsiel mgui ni gopd wnaa mëed, dzigo none betsaque zho tsielnie wnaa co stib, zeena gap wnaa mëed ne guiaan xlugar xpëed zha ne gut ga.

²⁰'Bio tib dii zha co znu bzhaac, gadz bets nac zho. Ptsieelnia zha ne nac zha gol, zeene laa zho gut, biaan xpëed zho. ²¹Dzigo ptsieelnia stib bets zho wnaa co, blozh ga gutaque zha co, pasë zho nsan mëed. Ptsieelniaque me stib zho, goc zho tson, niicle zha co psandaque mëed. ²²Sca sca haxta bza gza gadzse zho ptsieelnia me, per ziese zho ni tib zho psand mëed; tibaque zeene yeque me, laa me gut. ²³Mïne racladz no gacndion no, ¿chopaa dzigo gac tsiel wnaa co gal dze ne laa zho grieegan; sac gza gadzse zho ptsieelnia me?

Sca bnabdiidz zho, sac nac zha saducé riladzd zho ne nli zdziñ dze grieegan zha ne ret.

²⁴Dzigo pquiab Jesús rëb me lo zho:

—I nagon laa to rxin. Mïne naca riende to zha nac Xtiidz Dios, niicle riladzde to zrieelo me gun me ncuuan ro ne gard gan miech. ²⁵Sac gon, zeene gal dze ne laa grë miech grieegan, niicle mguiw niicle wnaaw led yedraa hor co dien cho tsielnie zho; sac hor co laa zho gac zig nac grë anjl ne no gbaa.

²⁶'Stiba, ible nli zrieeban mengut. ¿Pe gard ganle glab to lo guits ne pquiaa Moisés, zaatne ziaad zeene bin Moisés tsi Dios tib lo yag zarz nguia ne noyazbel? Rëb Dios lo Moisés: “Naa nac Dios ne riladz Abraham, naa nac Dios ne riladz Isaac, naa nac Dios ne riladz Jacob.” ²⁷Niicle ne gutle gza zha co hor co, per zeene sca bnee Dios, gase rlu ne mban zho no zho lo me. Sac tel Dios, nacd me xDios mengut sinque xDios zha mban nac me. Ise nagon rlu, peet riende to gane squi rnee to.

Xley Dios mïne mazdraa non

(Mt. 22:34-40)

²⁸Zeene sca nozodiidznie Jesús zha saducé co, gon tib maistr ley niapse diidzli ptsire me lo xtiidz zho. Dzigo wbig maistr ley co, bnabdiidz me lo Jesús, rëb me:

—Bzhiguiel bnë lo naa dien, lo grë xley Dios, ¿pa min nac mine mazdraa non?
²⁹Pquiab Jesús rëb me:

—Min rii nac mine mazdraa non, znu rneew: “Grëse to men Israel, golquiaadiaga ganle: men ne nac Dios ne riladz ne, tibaque me ni me nac men ne rnabey ne. ³⁰Dib zdoo to, dib xalm to, dib guielbiini ne no guic to, dipse xfuerz to golleynie me.” Lëë tiba nu, ³¹laa stiba znu rnee: “Bleynie samiech luu zigne rleynie luu luu.” Tsodraa stib ley ne mazdraa non lo grop ley rii.

³²Dzigo rëbchaa maistr ley co lo Jesús:

—Diidzli rnee luu maestro, tibaque Dios no. ³³Ni none dib zdoo ne, dib guielbiini ne no guic ne, dipse xfuerz ne gleyne ne me; ni gleyne ne samiech ne zigne rleynieque ne ne. Min co nac mine mazdraa non, lëdle gzëëg ne pe cos cogon ne lo me o dien peragaa gun ne.

³⁴Zeene gon Jesús sca niini rzë xtiidz me, rëbchaa Jesús lo me:

—Zhile runfalt sëëb luu xnëz Dios, gnabey me luu.

Blozh ga, grëse zha ne ndxie ga, ni stib zho biazhdraa zho pe nabdiidz zho lo me.

¿Cho xpëëd nac Crist?

(Mt. 22:41-46; Lc. 20:41-44)

³⁵Sca noseed Jesús miech len yadoo ga, zeene bnabdiidz me lo zho, rëb me:

—¿Bay zha nacne rnee grë maistr ley, lo xtii rey David ga grieequia Men ne nacle diidz ga cxeel Dios? ³⁶Sac zeene bdeed Espiritu Sant guielbiini lo rey David, znu bnee David:

Bnee Dios lo men ne rnabey naa, rëb Dios lo me:

“Cue naa nëz derech, nu bzob,

nieda lozh gnaz naa grëse zha ne rlëë lo luu, csañ naa zho lадznia luu.”

³⁷Gase nagon telne nli zha xtii David gac Men ne nole diidz cxeel Dios ga, ¿zha nac dzigo ne lëëque David rnee ne me rnabey David?

Grë miech guizhiu ne ndxie ga noquiaadiag zhiwseed me, per nli rley zho ron zho zha rnee me.

Zha run grë maistr ley

(Mt. 23:1-36; Lc. 11:37-54; 20:45-47)

³⁸Laa me noseed grë miech co, zeene pso me diidz lo zho rëb me:

—Ible tsienalde to mine run maistr ley gon. Sac grë zha ne nac maistr ley, rdziladz zho racw zho lar nool haxta zhits ni zho rbiba, rdziladz zho ndooladz yquiaabdiuzh miech zho zeene gdzieel zho zho dib ro nëz. ³⁹Zig nac len yadoow, zha nac zha ne rzob lo xcan zaatne rzob grë zha non, zeene tsiegaa zho tib lni lidz miech, lëëpaaze zha nac zha ne rzob groļ mezh zeene laa wagw gac. ⁴⁰Ni rlozh ga, rio zho rla zho tel pe ncuane rapse grë wnaa viud; ni parne peet guiabd miech lo zho, xtse rzo zho rzadraa pe lay ne goļ zho.

'Sca gon nac zho, per ib tedsod zeene laa grë miech ngoopdol quizh xfalt, zha nac zha ne mazdraa nroob caxtigw yгаа.

Gon ne bdeed tib wnaa viud

(Lc. 21:1-4)

⁴¹ Blozh ga, güey Jesús güeysob me gax zaatne zhoob grë alcancí. Dzese rwi me ran me zha riesan miech gon len grë alcancí co; ndal grë zha ricw rdzin, nroob dimi rsan zho.

⁴² Tibaque zeene bdzin tib wnaa viud, tib men prob nac me, ye me laa me psan chop gaay win len alcancí co.

⁴³ Dzigo bredz Jesús xpëedscuel me, rëb me lo zho:

—Gneli naa lo to ganle, mazdraa gon nroob non gon ne bdeed wnaa viud qui, lëdle gon ne bdeed grëraa zha qui. ⁴⁴ Sac zha, dimi ne riaanle lo zho i rgogon zho; sangue wnaa prob qui gon, centav yeen ne quianiese me mine rnalopaa me gziuu pe gow me, per laa me bloogona.

¡Nsin golso!

(Mt. 24:1-28; Lc. 17:22-24; 21:5-24)

13 Laa Jesús zieriee len yadoo nroob co grë xpëedscuel me, zeene rëb tib zho lo me:

—Maestro, ¡bui ganle zha niaataa yadoo rii! ¡Zha rnataa grë quie ngol ne niaaw!

² Pquiab me rëb me lo zho:

—Nligaa lëe zha niaataaw. Per niicle squitaa gon ran tow niina, zdzin dze ne nitlow dib nacesw. Ni stib quie qui guiaandraa zigne squi zhobxcuaaw i.

³ Brie me ga, laa me zie gza me zho. Bdzin zho cho Gui Oliv, ga bzob zho grë zho. Nieenpaa ro yadoo co zaatne zob zho ga; dzigo wbig Pedr, Jacob, Juan ni Ndrés lo me, gza tap zho nbadidiidz lo me rëb zho:

⁴ —Bzhiguiel bnë lo no dien, ¿pa hor dzigo gac mine bzeet luu ga? ¿Zha nacesñ ne tso zeene laaw csilo gac?

⁵ Dzigo psilo me bnee me lo zho, rëb me:

—Nsin golso zeena choot yquidiede to. ⁶ Sac nzian zha ne greequia gnë zho zha nac Men ne zëëble diidz cxeel Dios; ni nzian miech ne yquidie zho.

⁷ Zeene gon to nëzrii nëzrec noyac dil, ib gdziebde to; sac ible none gac grë min co, ni lëdsew ga. ⁸ Sac garaa csilo grë dil dox, grë guiedz nroob laaw tilnie saguiedz nrooba; grë zha ne rnabey grë guiedz nroob, laa zho tilnie sazha rnabey zho. Nëzrii nëzrec csilo gni grë zho dox, nzian zaatne gan miech gbin. Ni lega loxaque mine rsilosew ga, sac nroobraa guielne ne gan miech lozh ga.

⁹ Zeene laa grë ncuuan rii rsilo noyac, ¡nsin golso! Sac hor co laa miech tsiezo to lo zha ne rnabey yadoo, ni lëëque len yadoo ga quin zho to; ziezo zho to lo grë zha non, lo grë zha rnabey, loxaque ne no to xnëz naa. Ga nagon gdeeda diidz gnee to Xtidz naa lo grë zha co, ¹⁰ sac ib none brieets bliaallew lo grëse miech zeene gal dze ne laa guidzliu nitlo. ¹¹ Zeene tsiezo zho to lo

wxtis, tso^de to zhgab dien pe guiab to lo wxtis; sac Espiritu Sant nac men ne gacnien to, ni mine csiaab me guic to min co gnee to.

¹²Len dze co, zio zha ne lëëque zha tsielo bets zho ladznia zha ne gut zho; zio zha ne lëëque zha tsielo xpëed zho ladznia zha ne gut zho; scaquegaa mëëda, zio zha ne lëëque zha gut pxoz zho, lëëque zha gut xnⁱaa zho. ¹³Ible gandzed miech to, grëse zho glëe lo to sacne riladz to naa; per scagaa, grëse zha ne dziits so haxta lozh grë guielnë co, ible scaania Dios zho.

¹⁴Zeene gan to laa ncuane ziaad gnitlo zo zaatne rieguiald sow, zigne bzeet profet Daniel (zha ne glaba, none guien zho zha naca), hor co golguib dien zha xoon to. Zha ne no grëraa guiedz ne ngab Judé, none tsie zho dan, ga tsietsolan zho. ¹⁵Zha ne no glaa guic yu, none lëëlëd xoon zho, ib guiabd zho sëëb zho len yu tsiebee zho ncuane nacchen zho. ¹⁶Zha ne zogaa dana, ib gund zho ne laa zho tsie ro lidz zho tsixi zho xab zho. ¹⁷Prob grë men wnaa ne lëëtaque len dze co zoney xpëed, men ne quaniegaa mëdyeen ne bii radz!

¹⁸Golnab lo Dios gande to guielnë co len mëe ne rac nal, sac ne nligaa guielnë nrooba. ¹⁹Wlal ne biaan guidzliu haxta lo nadze, gard gan miech tib guielnë dox sca, ni gdzindragaa dze ne gan zhow stib. ²⁰Telne csaan Dios nroob dze gac guielnë co, ni stib miech rii guiaandraa; per na por grë zha ne bzooblo me sëëb xnëz me, gdeete me diidz gaca nroob dze.

²¹Len dze co, tel cho zha gnë lo to: “Golwi ganle, lëë men rii nac Men ne nole diidz ga cxeel Dios”, gnëgaa zho: “Golwi nec ganle, lëë me i”, gliladzde tow. ²²Sac ndal grë zha ne grieequia guiaadquidie miech, no zho gnë zha nac men co, nogaa zho gnë zha ziadteed Xtiidz Dios lo miech; ni zun zho grë milagr parne yquidie zho miech, parne yquidie zho haxta grë zha ne ngable lo Dios. ²³Nsin sca golso! Ib cxende to, benque laa naa nilew lo to.

Ziaad Jesús stib

(Mt. 24:29-35, 42, 44; Lc. 21:25-36)

²⁴Zeene lozhse gan miech grë guielnë dox co, laa lo ngbidz ycow, gziinidraa mëe. ²⁵Grë mel ne ndziib gbaa, laa ma gliaal; grëraa ncuane no gbaa, masaque nëzrii nëzrec gaca. ²⁶Hor co bii zan zho ganle, zeene laa Men ne pxeel Dios ziad-zëëb glaa lo xcow con grë guielndzon con grë poder ne rap me. ²⁷Lozh ga laa me gnabey grë xanjl me, tsie zho tsietop zho grëse zha ne ngab lo me, niicle zaatne mazdraa zit lo guidzliuw, mazdragaa zit gbaaw.

²⁸Golzooob cuidad zha nac yag guigw. Led nanle to ganle, zeene laa grë zhicwa racnieen, ni rsilo rdzib zhiblaga, gase rlu ne laa mëe nëëg ziaadgaxle. ²⁹Scaquegaa nagon, zeene gan to laa grë mine rne naa lo to nu rsilo noyac, dzigo nanle to lëë dze co ziaadyoble. ³⁰Gneli naa lo to ganle, nzian miech ne mban niina bii zan zho zeene laa grë ncuane co csilo gac; sac ible ncuane gaca. ³¹Zdzin dze nitlo gbaa, nitlo guidzliu, sangue mine rne naa lo to nu, nitloda, ible laaw none gac. ³²Lëëraasi choot nand dien pa dzew, dien pa horgaaw, per ni grë anjl ne no gbaa, per ni naa nanda; loxaque Pxo^zse naa nana. ³³Gacxe waa, nsin golso, golnab lo Dios; sac gon nande to dien pa hora.

³⁴Nac cuent rii zig nac tib zha ne rree zie tib guiedz zit. Zeene laa zho rree, rсанse zho diidz dien pe gun tib tib moz ne guiaan ro lidz zho, ni rso zho diidz lo zha ne rquianap ro puert nsin so zho, ib gaguiesd zho. ³⁵Scadaa to nagon nsin golso, sac zig bizhuan yu co scaquegaa naa nande to pa hor guial naa, yase glanso naa tib bdze dze, tib grol guieel, wxingaa horne rcuedz gall, o ziaadyunmbegaa liu. ³⁶Nsin golso, zeena ine zobna to zeene laa naa glanso. ³⁷Mine rne naa lo to nu, laaw rne naa par grese miech.

Bnediidz zho dien zha gnaaz zho Jesús

(Mt. 26:1-5; Lc. 22:1-2; Jn. 11:45-53)

14 Schop ngbidz runfalt csilo lni Pascw, lni ne row zho guietxil ne riotsd ncobi; gre pxoz nroob ni gre maistr ley, laa zho noguib dien zha ngeuetsse gnaaz zho Jesús gut zho me, ²rnee zho:

—Laa me no yгаа, per læeraasi gnaazd ne me mer dze lni, sac miech guizhiu ne ndxie lo lni dze co; zrieequia nzian zha ne glisquiw.

Pchoob tib wnaa nceit nex guic Jesús

(Mt. 26:6-16; Lc. 22:3-6; Jn. 12:1-8)

³Len dze co, laa Jesús no guiedz Betain. Lëëtaque laa me no mezh lidz Simón ne blan guiedz lepr, zeene bdzin tib wnaa bdzinnie tiblo nceit nex, nosew tib len ncuaan win niaa niapse quie rbebni, tiblo nceit niazha. Dzigo blë wnaa co ncuaan win co, blozh ga pchoob me nceit co guic Jesús.

⁴Blalaa zha ne zobgre Jesús ga, zeene gon zho sca been wnaa co, blëe zho, rëb zho:

—¿Pa rieguala squi pxin zhlë wnaa qui nceit qui? ⁵Tejne niaca mine ndow, nguizhpaa zhow tson gayoo pes plat, nquiinpaa dimi co ngaaza lo gre zha mban ne guiend pe yquiin.

Laa zho nolisquiw lo wnaa co, ⁶dzigo rëbchaa Jesús lo zho:

—Golsaan me. ¿Pe nacne rlisqui tow lo me? Led lega pxind mew, tib guielnzaac nroob i been me lo naa. ⁷Tejne nli rquia zdoo to zha ne guiend pe yquiin, zac ygad to lo zho stib dze, sac tibaque ran to zho; sangue naa dzin dze ne gbiche naa lo to, gandraa to naa. ⁸Laa wnaa qui been mine brieelo lo me, laa me pchoob nceit nex rii guic naa zeena nzhixcuaale xcuerp naa gal dze ne laa naa ygueets. ⁹Gneli naa lo to ganle, dipse lo guidzliu zaatne cseedtaa miech Xtiidz Dios, ible soladz zho wnaa rii, seet zho mine been me nu.

¹⁰Lo gza tsiipchop zha ne nac xpëedscuel Jesús ga, brie zha ne lë Judas Iscariot güeyzodiidznie Judas gre zha ne nac pxoz nroob, rëb Judas laa Judas gun me ntregar. ¹¹Zeene bin zhow, per nli rley zho ni rëb zho zdeed zho dimi lo Judas. Dzigo psilo Judas noguib Judas dien pa hor gdeeda diidz gun Judas me ntregar.

Dowxtseenie Jesús xpëedscuel me

(Mt. 26:17-29; Lc. 22:7-23; Jn. 13:21-30; 1 Co. 11:23-26)

¹²Mer dze ne rsilo lni Pascw, dze ne rowxtsee zho tib carner, ni rsilo zho row zho guietxtil ne rquiad ncobi lad, dze co bnabdiidz xpëedscuel Jesús dien pa lo racladz me tsiegunlo zho ncuaaṅe gowxtseenie me zho wdze co. ¹³Dzigo pxeel me chop zho Jerusalén, rëb me lo zho:

—Goltsie Jerusalén. Ga gaṅ to tib mgui nzobyan tib re nis, dzigo goltsienal zhits me. ¹⁴Yu ne gaṅ to sëeb me, golguiab lo bizhuan yu co: “Znu nē maestro: ¿Pa leṅ yu me gneedz luu gac zaatne gowxtseenie me xpëedscuel me wdze rii?” ¹⁵Dzigo ga glu me tib leṅ yu nroob ne riaan glaa, nzhixcuale leṅa, grële ncuaaṅe yquini no ga; dzigo ga golgunlo zhixtsee ne.

¹⁶Laa grop zha co brie, laa zho zie. Bdzin zho lad guiedz Jerusalén, nligaa laa zho bdziel yu co zigne rëbse me lo zho ga, dzigo psilo zho beenlo zho xtsee co.

¹⁷Bdze dzew, laa me bdzin leṅ yu co grë xpëedscuel me.

¹⁸Laa me no mezh noyownie me zho, zeṅe rëb me lo zho:

—Laa naa gni lo to ganle, lëeque tib zha ne gon noyownie naa nu tsielo naa ladznia zha ne gut naa.

¹⁹Zeṅe bin zho sca rëb me, mban rac zho, dzigo psilo zho tibga tibga zho rnabdiidz lo me, rnee zho:

—¿Pe naaw?

²⁰Pquiab me rëb me lo zho:

—Ladaque to no zho, zha ne nosëeb xcuun leṅ xquien naa, lëe zho ga. ²¹Naa ne nac naa Men ne pxeel Dios, niina laa miech gut naa zigne raquietsew lo Xtiidz Dios; per, ¿probsaxe zha ne tsielo naa ladznia zho! ¿Mazd wen nie zho, ib niacd zho miech lo guidzliu!

²²Laa zho noyow zeṅe bzheṅ Jesús tib guietxtil, bdeed me xquizh lo Dios, blozh ga beengrol mew dzigo bdiiz mew lo zho, ni rëb me:

—Golquiina, lëe xcuerp naa i gon.

²³Ni bzheṅ me tib cop nroob vin, bdeed me xquizh lo Dios, blozhse bdeed me xquizh, dzigo bdeed me cop co lo zho, grëse zho go vin co. ²⁴Ni rëb me lo zho:

—Lëe xchen naa i, mine gzhiee par grëse miech ne sëeb xnëz Dios, sac lëe stib mod cub nu psan Dios parne sëeb miech xnëz me. ²⁵Lëe lultm vuet nu guie naa vin rii, sac zhaale stib vin cub ne guie naa zeṅe laa naa gdzin zaatne rnabey Pxoṅ naa.

Dzigo psilo me biil me bla salm gza me zho.

Bzeet Jesús zha guṅ Pedr

(Mt. 26:30-35; Lc. 22:31-34; Jn. 13:36-38)

²⁶Blozhse biilnie me Dios grë me zho, dzigo laa me brieenie zho ga zienie me zho nëz Gui Oliv.

²⁷—Ible saan to naa nawdze rii —rëb me lo zho—, sac scale ziaad lo Xtiidz Dios zaatne rnee: “Zdeed Dios diidz csiwee zho baxtor, lozh ga nëzrii nëzrec gliaal mëcwxiiil.” ²⁸Sca guṅ zho naa, per zeene laa naa grieeban glole naa ga Galilé, ga cuëz naa to.

²⁹Dzigo rëbchaa Pedr lo me:

—Niicle telne saan grë zha qui luu, saṅgue naa goṅ csaand naa luu.

³⁰Pquiab me rëb me lo Pedr:

—Gneli naa lo luu ganle, guieel riigazh, gardle grop gall tsonle vuelt rëb luu runbeyd luu naa.

³¹Per tibaque nac xtiidz Pedr, rnee Pedr lo me:

—Niicle tel zaatne guet luu guet naa, per guṅscad naa. ¿Pe nacne guiep naa runbeyd naa luu?

Scaque rnee grëraa zho.

Bzodiidznie Jesús Pxoṅ me Getsemaní

(Mt. 26:36-46; Lc. 22:39-46)

³²Bdziṅ Jesús zaatne lë Getsemaní gza me zho, dzigo rëbchaa me lo zho:

—Nuse nagon goṅsob, laa naa ga gazodiidznie naa Pxoṅ naa.

³³Hor co psilo mban rac zdoo me, riabguieṅne me, dzigo bredz me Pedr, Jacob ni Juan, bzënie me zho palal ³⁴dzigo rëbchaa me lo zho:

—Mban rac zdoo naa, zootle zig zet naa lo guieṅne rii. Nuse nagon goṅguiaaṅ, per goṅsobna.

³⁵Bzë me spalal, dzigo pquiitsgzhib me haxta bdziṅ lo me lo liu; psilo me bnab me lo Dios ne telne zrieelow mazd tete me grë guieṅne ne no gan me, ³⁶rëbchaa me:

—¡Papá, par luu grëse cos zrieelo guṅ luuw! ¡Bzhiguiel psilaa naa lo guieṅne rii! Per telne grieeloda, miṅe gnëtaa luu, sca gaca.

³⁷Zeene biire me bdziṅ me zaatne biaan gza tson zha co, goṅ me gzase zho nixguies; dzigo rëbchaa me lo Pedr:

—Simón, ¿nixguies luu lëë? ¿Pe ni palal blëëbd luu nzobna luu? ³⁸Goṅsobna, goṅnab lo Dios zeena yquiild mendox to. Niicle ne squi lëbdraa xcuerp to sobna to, per goṅnab lo Dios, sac goṅ miṅ co nac miṅe racladz zhiespíritu to.

³⁹Dzigo biire güey me stib, güeyzodiidznie me Dios; scaque miṅe bnab me glo miṅcoque bnab me stib. ⁴⁰Zeene bdziṅ me lo zho, goṅ me laa zho bii nixguies. Ni rdziel zho pe guiab zho lo me.

⁴¹Laa zeene goc tson vuelt biire me güeynab me lo Dios, rëbchaa me lo zho:

—Lëëw nagon, zacle na gaguies to, zacle gdziiiladz to. Naa ne nac naa Men ne pxeel Dios, naataa laa hor bdziṅ zeene laa grë miech ntseeb rii guiadnaaz naa. ⁴²Goṅtsieso, zeena zio ne; sac goṅ laa zha ne glu naa lo zho ziaadle nu.

Bnaaz zho Jesús

(Mt. 26:47-56; Lc. 22:47-53; Jn. 18:2-11)

⁴³Laa Jesús bii quianeeque, zeene laa Judas (tib zha ne nac xpëédscuel me) bdziñ, bdziñnie Judas tib dzoon zha ne pxeel grë pxoz ne rnabey, grë maistr ley ni grë zha non lo mengüiedz Israel. No zho nzhen spad, nogaa zho nzhen yag. ⁴⁴Biaanniele Judas zho diidz zha glu Judas cho nac Jesús, rëb Judas lo zho: —Nanle to gon, zha ne gow naa bzhid cuas, lëë me ga; ligier golso golxen me, ib csaande to xoon me.

⁴⁵Nligaaw, zigne bdziñ Judas bredz Judas Jesús; blozh ga dow Judas bzhid cuas me. ⁴⁶Hor co wbig grë zha ne zienal zhits Judas ga bzhen zho me. ⁴⁷Lo grë zha ne nacgza Jesús ga, hor co biasaque tib zho bdoz zho zhispad zho, pchug zho tib diag xmoz men ne nac pxoz nroob.

⁴⁸Dzigo rëbchaa Jesús lo grë miech co:

—¿Niacxe naa cho ngbaan, zha nac ne squitaa nzhen to spad, nzhen to yag ziadnaaz to naa? ⁴⁹Blactaa dze name gon to noseed naa miech len yadoo, ¿pe nacne bnaazde to naa ga? Per ible laa grë ncuaañ rii gon noyac, zeena gac grë mine raquiet lo Xtiidz Dios.

⁵⁰Grë zha ne nac xpëédscuel me ga, grëse zho bzhoon, tipse me psan zho ga. ⁵¹Tibaque mgui nguieg bii güeynal zhits me, tib lëse lar nquits mbix mgui; dzigo bnaaz zho mgui gocladz zho ye mgui nienie zho; ⁵²per znuuse brieeg mgui len lar co, bzhoon mgui coletse mgui.

Güeynie zho Jesús lo zhiwxtis zha Israel

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³Ga brieenie zho Jesús bdziñnie zho me lidz men ne nac pxoz nroob. Grë pxoz rnabey, grë zha ne rnabey lo maistr ley ni grë zha non lo mengüiedz, laa zho pcaalsa ga.

⁵⁴Ye Pedr, maase zit zit nal Pedr laa Pedr bdziñ xley men co. Bdziñ Pedr, güeysozba Pedr lo grë zha ne ndxienap, lëëtaque laa zho quiazdëë lo gui.

⁵⁵Grë pxoz co, grë zha ne nac zhiwxtis zha Israel, laa zho ndxie nëz len yu co, quiaguib zho dien pe yquiaaqui zho gnab zho guet Jesús, quiaguib zho dien pe dol ne ycaadz zho me; per rdzielz zho dien pew. ⁵⁶Nzian zha ne pquidie rëb zho znu znu nac ncuaañe noyün me, per rrieequiad xtiidz zho; sac zhaase zhaase rnee zho. ⁵⁷Tibaque zeene guso blalaa zho, bnexuu zho rëb zho:

⁵⁸—Bdzion no gon rëb me laa me ctixche yadoo, lozh ga tsonaque ngbidz gzaalo me stiba; per led miechdraa nzaaw.

⁵⁹Niicle scaw, rzëdaque xtiidz zho tipse.

⁶⁰Dzigo hor co bzoli men ne nac pxoz nroob, bzo me glowtaa lo grë miech co, bnabdiidz me lo Jesús rëb me:

—¿Pe nacne rquiabd luu? ¿Diidzli dzigo lëë nac grë mine rnee zho i!

⁶¹Dzese zo Jesús ib rquiabd me. Biireque men co bnabdiidz me stib rëb me:

—¿Nligaa cho nac luu? Bnë tel̄ nli Xpëed Dios nac luu, Men̄ ne nacle diidz ga cxeel̄ me lo guidzliu.

⁶²Dzigo pquiab Jesús rëb me:

—Nliw, naa nac men̄ co. Naa ne nac naa Men̄ ne pxeel̄ Dios, bii zan̄ to ganle zeene laa naa zoob cue Dios nëz derech, ni zeene laa naa guieet gbaa zialzëeb naa lo xcow.

⁶³Hor co ptsiez pxoz nroob co xab me, sac blëe me bin me sca rëb Jesús.

—¿Pe mazdraa textigw ne racladz ne? —rëb me—, ⁶⁴laa to binle ganle zha rzëtaa xtiidz me noguitnie me Dios. ¿Pe gnë to na zha gac me?

Grëse zho pquiab rëb zho, ib rieguiala guet me.

⁶⁵Dzigo hor co blalaa zho laa zho psilo notsuc lo me. Pxidoo zho lo me ni rdeed puñet zho me, lozh ga rnee zho:

—Bnë dien̄, ¿cho ga bdiñ luu?

Ye grë zha ne quianap ga, rgap zho lo me.

Rëb Pedr runbeyd Pedr Jesús

(Mt. 26:69-75; Lc. 22:56-62; Jn. 18:15-18, 25-29)

⁶⁶Laa Pedr bii zoque ley. Ga zo Pedr, zeene laa tib wnaa ne nac zhicriad men̄ rnabey co bdziñ; ⁶⁷gon̄ me laa Pedr zob gax lo gui nodzëe Pedr. Dze rwi me lo Pedr, tibaque zeene rëb me:

—¿Ye luu lëe rzënie Jesús, men̄ Nazaret ne bdziñnie zho i?

⁶⁸Per bneelid Pedr.

—Dieen̄ pe rool̄ luu —rëb Pedr—. Runbeyd naa men̄ co.

Brieega Pedr zie Pedr nëz ro zawan, lëëtaque hor co pcuedz tib gall. ⁶⁹Dzeque rwi wnaa co lo Pedr, dzigo rëbchaa me lo grë zha ne ndxie ga:

—¿Lëew, zha ne rzënie me nac mgui qui!

⁷⁰Biire Pedr rëb Pedr runbeyd Pedr me. Wdzeepaa goca, biire zha ne ndxie ga rëb zho lo Pedr:

—Ne nligaa, ye luu rzënie men̄ co. ¿Zha Galilé name nac luu!

⁷¹Dzigo psilo Pedr rzeet Pedr Dios rnee Pedr runbeyd Pedr Jesús, haxta rnee Pedr:

—¿Dios zobwi ganle, tel̄ne rned naa diidzli, maase cuibdee naa!

⁷²Lëëtaque hor co laa gall pcuedz stib. Dzigoraa psoladz Pedr xtiidz Jesús zeen̄ rëb me lo Pedr: “Gardle grop gall, tsonle vuilt rëb luu runbeyd luu naa.” Dzigo mbanse rac Pedr, psilo Pedr biin Pedr guieñë co.

Güeynie zho Jesús lo Pilat

(Mt. 27:1-2, 11-14; Lc. 23:1-5; Jn. 18:28-38)

15 Ziadyiinile liuw, scase bii nchool̄ rnow, wbiire pcaalsa grë pxoz non grë zho zha ne rnabey lo maistr ley, grë zha non lo mengüiedz ni grë zha ne nac zhiwxtis zho. Blozhse bnediidz zho, laa zho pxidoo Jesús güeysan zho me lo Pilat men̄ ne nac gobernador.

²Bdziñ me lo Pilat, bnabdiidz Pilat rëb Pilat lo me:

—¿Pe nli na luu nac zhirey zha Israel?

Pquiab me rëb me:

—Nliw.

³Tibaque quia grë zha ne nac pxoz non, rzadraa grë ncuaañe rcaadz zho me. ⁴Nacne wbiire Pilat bnabdiidz Pilat lo me, rëb Pilat:

—¿Pe nacne rquiabd luu? Bui ganle zha nactaa grë ncuaañe rcaadzdoł zho luu.

⁵Bzee zdoo Pilat goñ Pilat ible pquiabd me.

Bnab zho guet Jesús

(Mt. 27:15-31; Lc. 23:13-25; Jn. 18:38-19:16)

⁶Gzobse lni Pascw rsilaa Pilat tib zha ne no ladzguiib, teł cho zha ne gnabtaa menguietz laa. ⁷Leñ dze co no tib mgui lë Barrabás ladzguiib, ni zla zha ntseeb ne nacgza me, laa zho no ga sac nzian zha ne beet zho zeñe gocntseeb zho lo gobiern. ⁸Nacne psilo grë miech co, rnab zho lo Pilat csilaa Pilat tib zha ne no ladzguiib zigne runtaque Pilat grëraa iz.

⁹Dzigo bnabdiidz Pilat lo zho, rëb Pilat:

—¿Cho racladz to csilaa naa? ¿Pe silaa naa men ne rnee zho zhirey to nu?

¹⁰Sca rëb Pilat lo zho, sac nanle me niapse por rlëë grë pxoz non co ran zho Jesús gane bnabey zho bgaa me güeysañ zho me ga. ¹¹Per leł psilo grë miech co rnab zho csilaa Pilat Barrabás; ni lëëque grë pxoz co pquiil zho. ¹²Dzigo rëb Pilat lo zho:

—¿Zha dzigo racladz to gac men ne rnee zho zhirey to nu?

¹³Pquiab be grë miech co, roptsie zho rnee zho:

—¿Bnabey yquia me lo cruz!

¹⁴—¿Pe nac falt ne been me? —rëb Pilat—. ¿Pe nacne racladz to yquia me lo cruz?

Biire zho roptsie zho rnee zho:

—¿Bnabey yquia me lo cruz!

¹⁵Goñ Pilat zha rac zho ni racladzaque me guiannziuu me lo zho, nacne mazd bzoob me xtiidz zho, bnabey me blaa Barrabás; laa Jesús, blozhse bnabey me bdin zho Jesús laa me been Jesús ntregar lo grë menguiib ne tsiequiaa me lo cruz.

¹⁶Biire grë menguiib co bzëëbnie zho Jesús nëz leñ yulow, ga pcaalsa grëraa menguiib ne nacgrë zho. ¹⁷Psilo zho rguitnie zho me, bgacw zho me tib lar morad zig rna lar ne racw grë rey, ni bzieecw zho bla lë yag guiets bzoob zhow guic me, zig rzob coron guic grë rey. ¹⁸Dzigo psilo zho nguietz roptsie zho rnee zho:

—¿Golwi ganle zha ractaa zhirey zha Israel!

¹⁹Bzhen zho tib goobgui, rdeed zhow guic me, rtsuc zho lo me, rquiaalo zho rquitsgzhib zho lo me zig rquitsgzhib zho lo zha non.

Güeyquiaa zho Jesús lo cruz

(Mt. 27:32-44; Lc. 23:26-43; Jn. 19:17-27)

²⁰Blozhse sca bdziitnie zho me, laa zho blee lar morad ne nacw me ga, biire zho bgacw zho me miñe nac xab me; dzigo laa zho brieenie me ga zienie zho me zaatne yquia me lo cruz.

²¹Nëz zienie zho me, bdzieel zho tib mgui Ciren lë Simón (lëë pxoz Lejandr ga grop Ruf), znu ziaad me wbiire me dan. Dzigo bnabey zho me bi me zhicruz Jesús.

²²Zeene bdziñnie zho Jesús zaatne lë Gólgota (nac diidz co zig nac ne rnee ne “Gui Beerguic Ngutoo”); ²³ga bdeed zho nziu notsa guizh rmed ne lë mirr, nan zho nie mew, per god mew. ²⁴Dzigo laa zho pquiaa me lo cruz.

Blozhse pquiaa zho me lo cruz, bzhen zho tib xab me, pchug zhow, biaannie zho tib lëgaw tib tib zho, laa stiba bio zho rif. ²⁵Zig hor wxeeren ga pquiaa zho me lo cruz.

²⁶Glaa guic cruz ne pquiaa zho me ga, ga pquiaa zho bla lan diidz zaatne rnee pe nagne sca psacsi zho me, rneew: “LĒĒ MEN RII QUIA NU, PORNE NAC ME ZHIREY ZHA ISRAEL.” ²⁷Ye chop ngbaan pquiaagza zho me lo cruz, tibga zhicruz zho bzo tib nëz cho zhicruz me. ²⁸[Ga brieequia miñe raquiet lo Xtiidz Dios, zaatne rnee: “Bloo zho me lad zha ntseeb.”]

²⁹Grë miech ne rded zaatne quia me lo cruz ga, runnguzee zho me, rzhidznie zho me, haxta rdzi guic zho rnee zho lo me:

—jPe led rëb luu lëë, laa luu ntsi yadoo ni tsonaque ngbidz nzaalo luuw stib! ³⁰Nana zho, jpe gacd lëëque luu bla luu lo caxtigw qui, biet lo cruz qui!

³¹Scasaque grë pxoz non ni grë maistr ley, rzhidznie zho me; rnee zho:

—Stib miech scataa beenguic me, stib miech scataa bla me, pe nac dzigo rriielod me gla me me. ³²jTelne nli me nac Men ne zëëble diidz ga cxeel Dios, telne nli me nac zhirey ne, niinagazh quiet me lo cruz; zeena gliladz ne me!

Ye zha ne quiazga me lo cruz ga, rbidzgo zho lo me.

Gut Jesús

(Mt. 27:45-56; Lc. 23:44-49; Jn. 19:28-30)

³³Goj grol dzew, tibaque zeene goc tib ncow dipse lo guidzliu, haxta las tres biala biini stib. ³⁴Hor co nguiedz zëëb tsi Jesús, rnee me:

—jEloi, Eloi! jLama sabactani?

(Diidz co nac zig nagne rnee ne: jLuuse name nac xDios naa! jPe nagne psaan luu naa?)

³⁵Grë zha ne ndxie ga, zeene bin zho sca rbedz me, no zho nan Lí, men ne biadteed xtiidz Dios padzeela, men co rbedz me. ³⁶Dzigo rias tib zho güeygadz tib lë zhiil lo nziu bla, bzoob zhow tib guic goobgui pquiaa zhow ro me.

—jGotsaa csaan —rnee zho—, nu dzian ne dien pe ziaad Lí guiaadlit Lí me lo cruz!

³⁷Tibaque zeene pquiaa me stib redz nroob, znuse blozh me.

³⁸Lëëtaaque laa me nolozh, zeene briez nzoli lar nroob ne quia len yadoo, groltaa goca. ³⁹Gax lo me ga zo men ne rnabey lo grë menguiib co, zeene gon men co zha gut me, rëbchaa me:

—¡Ne nligaa, Xpëed Dios nac men qui!

⁴⁰Ye blalaa men wnaa güeyso ga, zit zo zho rwi zho; lad co no Marí Magdal, Salomé ni Marí ne nac xniaa Jacob niab grop José. ⁴¹Nzianlaa nac zho, lëë grë wnaa co been xyudar me len dze ne güeyted me dib xtan zha Galilé; ni zlagaa zha ne güeynal zhits me zeene bdzin me Jerusalén.

Bgueets Jesús

(Mt. 27:57-61; Lc. 23:50-56; Jn. 19:38-42)

⁴²⁻⁴³Lëëtaaque dze co nac vispr dze ne rdziiladz zho lo dziin. Zeene laa dze bdzepaa, dzigo güey José (men Arimaté) lo Pilat bnaab me diidzbey tsiequeets me Jesús. Glo zoot me tsied me, per tibaque bloo me tib valor güey me; niicle ne tib zha non nac me lad zhiwxtis zha Israel, ye me quiambëz gdzin dze ne gnabey Dios.

⁴⁴Bzee zdoo Pilat zeene bin me laa Jesús gutle. Bnabey me gocredz zha ne rnabey lo menguiib ne quianap Jesús; ⁴⁵haxta bdzinraa men co rëb nliw, dzigora bdeed me diidz tselit José Jesús lo cruz.

⁴⁶Nacne güey José, güeyysi me tib lë lar nroob. Zeene blozh blit me Jesús lo cruz pchel me Jesús lar co, dzigo güeyxob me me tib len baa ne ndieen tib cho quie. Blozh ga, psodan me tib quie nroob psioog me ro baa co.

⁴⁷Ga zo Marí Magdal ni Marí xniaa José, gon zho pa lo bgueets me.

BRIEBAN JESUS

(Mt. 28:1-10, 16-20; Lc. 24:1-53; Jn. 20:1-23)

16 Bdze dze dze ne rdziiladz zho lo dziin, güey Marí Magdal, Salomé, ni Marí xniaa Jacob güeyysi zho grë nceit nex ne tsietëëb zho lad xcuerp Jesús. ²Laa zeene biini liu, dze ne rzobni zhmal, silgaw loxaque ziaadlan ngbidza, laa gza wnaa co brie laa zho zie ro baan Jesús.

³Nëz no zho, rnabdiidzlsa zho dien zha gdiob quie nroob ne nioog ro baa, cho siguiel coba. ⁴Ni zeene bdzin zho, gon zho laa quie co bdiooble.

⁵Laa zho bzëëb len baa, zeene gon zho nëz derech laa tib mguig nguiieg zob ga, nacw me tib lar nool, dib nquitsbiese rna lar co. Bdzieb zho gon zho me; ⁶dzigo rëbchaa me lo zho:

—Gdziebde to. ¿Jesús lëë, men Nazaret ne pquiaa zho lo cruz, men co ziaadguib to? Guiendle me nu, ¡laa me brieaban! Gołwi ganle nu nac zaatne pxob zho me. ⁷Gołsie, gołguiab lo Pedr ni lo grëraa xpëedscuel me tsie zho Galilé, ga tsiedziel zho me zigne rëble me lo zho glo.

⁸Rias gza wnaa co laa zho brie ga, masaque rzhidz zho rdzieb zho. Lo dzeb co ni par gnee zho gacd.

⁹[Dze ne rzobni zhmal ga, sil co brieaban Jesús, ni Marí Magdal nac zha ne gloopaa gon me; lëë Marí co ga benguig me zeene benxoon me gadz mendox

ne nosacsi Marí. ¹⁰Dzigo güey Marí güeynie Marí diidz lo grë zha ne bzënie me ga. Lëëtaque laa zho ndxie, mban rac zho, roon zho no zho xquielnë me.

¹¹Niicle bin zho rëb Marí laa me brieebanle, gonlo Marí me; per bliladzd zhow.

¹²Bded ga, brieequia me lo schop xpëëdscuel me lëëtaque no zho nëz zie zho dan. ¹³Dzigo güey zho güeynie zho diidz lo grëraa zha ne nacgza zho; per niicle xtiidz grop zha co bliladzd zho.

¹⁴Laa stibtaa vuelt, lëëtaque ndziib zho lo mezh no zho wagw gza tsiiptib zho, tibaque zeene laa me brieequia; dzigo goctox me lo zho, sac gon me ib bliladzd zho xtiidz me; ni gon me scataa nad zdoo zho, sac niicle güey zha ne gon me güeynie zho diidz ne nli brieeban me, ni bliladzd zhow. ¹⁵Ni rëb me lo zho:

—Goltsie dipse lo guidzliu, goltsieseed miech Xtiidz Ndzon Dios. ¹⁶Grëse zha ne dib zdoo gliladza ni chobnis zho, scaania Dios zho; sangue zha ne gliladzda, laa zho bnitlole ga. ¹⁷⁻¹⁸Grë zha ne sca dib zdoo gliladz naa: znee zho stib diidz ne rneed zho. Niicle xen zho grë meel ntseeb, concuaangaa miech zho, ib peet gacd zho. Ni zeene cxobnia zho guic grë men rzacnë, zunguiac zho zho; grë mendox ne noguitnie miech, zeene gzeet zho lë naa zunxoon zho ma.

¹⁹Blozhse sca bnee me lo zho, laa me zey gbaa bzob me cue Dios nëz derech.

²⁰Dzigo grëse xpëëdscuel me laa zho brieë, brieets bliaal zho zieseed zho miech Xtiidz Dios. Ni me nac men ne noyacnien zho run zho grë milagr nroob, zeena glu ne nli Xtiidz me nac mine noseed zho miech.]